

Fragment of a rectangular paper label, mostly torn and illegible.

Vg  
4460





XVII, 516















Warnunge  
D. Martini Lu-  
ther / An seine  
lieben Deud-  
schen.

Wittenberg.

1 5 3 1.

XVII 516



BIBLIOTHECA  
MONICKAVIANA



# Warnunge S. Martini

Luther / An seine lieben  
Deutschen.



**I**ch hab an die geistlichen  
auff diesem Reichstage zu Augspurg/  
mein vleissig vnd trewes vermanen la-  
ssen offentlich ausgehen / Vnd auffss  
höhest gebeten / das sie ja nicht den  
Reichstag / da alle welt so hertzlich  
auff hoffet vnd gasset mit grossen sehnem / solten on  
ende zugehen lassen / Sondern dahin handeln / das  
friede gemacht / etliche ire grewel geendert vnd dem  
Euangelio raum gegeben würde / Welchs ich auch /  
mit meinem gebet / fur Gott / aus allen krefftten ge-  
sucht vnd gesufftzet habe / sampt allen frumen Chris-  
ten . Das aber wedder vnser vleissig gebet / gegen  
Gott / noch vnser trew vermanung an sie / etwas ge-  
holffen hat / ist leichtlich zu rechen / was es bedent /  
nemlich / das sie Gott / als die verstockten vnd ver-  
blendten / welche so viel vnschuldigs blut / Gottsleste-  
rung vnd grewlichs vnbusfertiges leben / drückt /  
nicht werd hellt / das er inen einen guten gedancken  
odder süfftzen eingebe / odder das sie einigem wort  
heilsamer vnd fridlicher vermanung / gehorchten /  
Vnd stehet mit inen / wie es zur zeit Jeremie stund /  
mit den Juden / Da Gott zu im sprach / Jere. xv.  
Vnd wenn gleich Mose vnd Samuel fur mir stün-  
den / so



den / so hab ich doch kein hertz zu diesem volck / Treibe sie nur weg von mir / vnd las sie faren / Vnd Jeremie. viij. Vnd du solt nicht fur dis volck bitten / weder klagen noch flehen fur sie / auch sie nicht vertreten / Denn ich wil dich doch nicht hören.

Solchs antwort mus ich vnd die meinen / vns itzt auch lassen gelten vnd gesagt sein / vnd bisher vergeblich fur die geistlichen gebeten haben / Weil Gott mit der that gewaltiglich zeuget / das er vns fur sie nicht erhören wolle / sondern sie lassen gehen vnd sich / wie Pharao / inn den heiligen geist versündigen / bis das weder busse noch besserunge zu hoffen sey / Denn solt etwas mit beten fur Gott zur heben / vnd bey den geistlichen / mit vermanen / flehen / demut / gedult / erbietten / warheit / recht / guten sachen zc. etwas zurlangen gewesen sein / so solts gewislich itzt auff dem Reichstage zurlangen gewesen sein / So ernstlich (das weis ich) ist von den Christen gebettet / vnd so hohe demut / gedult vnd flehen / ist da beweiset / vnd so gute rechte sache haben sie fur inen gehabt. Nu sie aber den Reichstag nicht allein on ende vnd fried haben lassen zurgehen / sondern vnfriede gesterckt / vnd mit drewen vnd trotzen beschlossen / So wil ich sampt den meinen vnser gebet / nach Gottes befelh / auch einzihen / vnd wie S. Johannes leret / fur die sünde zum tode / nicht beten / Sondern dem verstockten Pharao zu sehen / wie in Gott im roten meer teuffen wird / Denn vnser gebet vnd flehen vmb fried / obs bey den verstockten verloren ist / So wirds vns doch deste stercker helffen / vnd hat bereit an / auch zu Augspurg / gros wunder gnug gethan /  
Vnd



Vnd sol auch mit Gottes gnaden durch dringen bis  
ans ende / Denn wir sind doch erhöret vnd müssen er-  
höret sein / das hat vns bisher nicht gefeilet / Sol vns  
auch noch nicht feilen / Das weis ich fur war / Amen.  
Vnd sol gehen nach dem spruch Christi / Wenn der  
Apostel grus vnd fride etwa inn einem hause nicht  
stat noch friedes kinder fand / so solt sich jr friede wid-  
der zu in lencken. Also auch hie / weil die geistlichen  
weder gebet noch frieden achten / Sollen beide gebet  
vnd frieden drum vnuerloren sein / sondern zu vns  
widder keren / vnd den geistlichen / an stat des ge-  
bets / eitel fluch / vnd an stat des friedes / eitel vnfrie-  
den / vnd beides die fülle zu komen / Amen.

Darumb weil jr furnemen schlecht vnd steiff ste-  
het auff der gewalt / vnd setzen ire sache auff die  
faust / widder die offentliche vnd bekandte warheit  
Gottes / So sol sich niemand fur in furchten / vnd sey  
nur jederman getrost vnd vnerschrocken widder sol-  
che wütige Gottes feinde. Denn sie ruffen vnd beten  
zu Gott nicht / können auch nicht beten / fur bösem  
gewissen vnd sachen / faren einher aus hohmut vnd  
trotz auff fleisch vnd blut / vnd dürffen schlecht kei-  
nes Gottes dazu / Ja dürffen in auch nicht drum  
fragen / ob er das haben wolle / was sie dencken / Da-  
selbst hat denn Gott grosse lust vnd liebe zu / vnd lesst  
im solchen trotz vnd seiner gnade verachtung / seer  
wol gefallen / pflegt auch gros glück vnd sieg zu sol-  
chem trotz vnd vermessenheit zu geben / das beide  
Nos vnd man im roten meer ligt / vnd alles vber vnd  
vber gehet / bis nicht einer vber bleibt. Wir aber gantz  
sicher sind / das jr wütiges furnemen / nicht inn irer  
M ij macht /



macht/sondern inn Gottes hand stehet/vnd sie noch  
nicht so bald haben/was sie wöllen / Er wird auch  
wollen ein Herr vber sie sein/wie noch bisher jmer  
geschehen/das sollen sie wol erfahren / So wil ichs  
doch itzt dahin setzen/ als sey kein Gott/vnd als im  
traum vergeblich dencken/das jr gedancken vnd fur-  
nemen/angehen vnd fort faren werden mit gewalt.

Wenns nu auff's aller ergest gerett/ So mus der  
zweier eins geschehen / Ein Krieg odder Auffrur/  
Villich alle beide zu gleich / Denn es stehet wol  
drauff (wir reden itzt im traum/ da kein Gott ist)  
wo sie mit Krieg anfahen/das sich etwa ein fenlin auff  
werffe/vnd rotte sich ein hauffen zu samen/auch vn-  
ter irem eigen volck/das beide sie selbs vnd wir auch  
mit zu grund gehen/ Denn sie dürffen sich inn sol-  
chem fall auff vnser lere nicht lassen/als seien sie nu  
gewis/das sich niemand widder sie setzen werde/weil  
wir widder die auffrur hart geschrieben vnd geleret  
haben/man solle auch der Tyrannen freuel leiden/  
vnd sich nicht weren / Wol ist's geleret / Aber die  
thetter kan ich nicht schaffen / Sintemal auch alle  
ander stücke vnser lere / wenig halten vnd achten /  
Würde nu der hauffe / vnser lere widder die auffrur  
von vns geleret / auch nicht halten/sonderlich/weil  
ihener freuel vnd mutwilliger Krieg/so vnleidliche vr-  
sach dazu gebe/so würde sie der Teuffel weidlich be-  
schmeissen/vnd sie gar hübsch vnd lecherlich einen  
blossen legen/ Ich rede itzt jmer im traum/Aber sie  
mögen zu sehen/das der traum nicht war werde/  
Der traum schadet mir nicht/Triff er sie/So haben  
sie es.

Wolan/



Wolan/Es gerate gleich/wie gesagt/zum Kriege  
ge odder zur Auffrur ( ob Gottes zorn ja fort gehen  
müſte/als ich ſorgen mus ) So wil ich hie mit dieſer  
ſchrift/fur Gott vnd aller welt bezeuget haben/das  
wir/ſo die Lutheriſſchen geſcholten werden/Keinen  
rat noch willen/ja auch keine vrsachen dazu gegeben/  
Sondern allewege vnd on auffhören/vmb friede ge-  
beten vnd geruffen haben/ Vnd die Papisten ſelbs/  
wiſſen vnd müſſen bekennen / das wir biſher friede  
geleret vnd auch gehalten haben/vnd itzt auff dem  
Reichstage auff's höchſt begeret/ Derhalben/wo ein  
Krieg odder auffrur angehet/man ja nicht ſagen mag  
noch kan/Sihe/das iſt die frucht der Lutheriſſchen  
lere/Sondern man wird ſagen müſſen/Sihe/das iſt  
der Papisten lere vnd frucht/die haben nicht wöllen  
friede/weder fur ſich haben noch bey andern leiden/  
Denn wir haben ja biſher inn der ſtille geleret vnd  
gelebet / kein ſchwert geſucht / niemand verbrennt /  
gemordet/beraubt/wie doch ſie biſher gethan vnd  
noch thun/Sondern haben jr morden vnd rauben/  
toben vnd wueten/mit der aller höchſten gedult ge-  
tragen.

Zu dem/itzzt auff dem Reichstage/ da auff der  
Papisten ſeiten / ſolch dreyen / trotzen/pochen/hö-  
nen vnd ſpotten/den vnſern widderfaren iſt/haben  
die vnſern ſich auff's tieffſt imer gedemütiget/schlecht  
mit füſſen vber ſich laſſen gehen/vnd dennoch imer  
friede gebeten/geflehet vnd alles erboten/was Gott  
leiden mag. Vnd wenn vnſer teil eitel bettel buben ge-  
weſt weren/were es doch mehr denn zu viel geweſt/  
ich wil geſchweigen/das ſolch/höhe/groſſe/furſten/  
herrn/frum vnd redliche leute/ ſind / Das ich acht/  
Solch



Solch bekentnis / solch demut vnd gedult / sey nicht  
viel geschehen / weil die Christenheit gestanden / vnd  
meiner hoffnung / die grössste sein sol / fur dem jüng-  
sten tage / Noch hüffts nicht. Der Müntzer vnd die  
auffrürer haben solchs nicht gethan / Sondern / sie  
theten / wie itzt die Papisten thun / Wolten auch we-  
der friede haben noch geben / griffen mit gewalt  
drein / liessen kein mittel noch erbieten gelten / Schle-  
cht mit dem kopff hindurch / Wolten dazu ire lere  
nicht lassen verhören / wie doch die vnsern itzt gethan  
zu Augspurg / Sondern schlecht alle lere verdampt /  
vnd ire eigen gerhümet / inn aller masse / wie itzt die  
Papisten ir schrift auch nicht haben wollen von sich  
ans liecht geben / vnd doch vnser lere verdampt / da-  
von weiter hernach / Das kurtz vmb / Vns kein  
schuld noch vrsach / weder kriegs noch auffrurs / mag  
auffgelegt werden / weder fur Gott noch fur der welt.

So nu vnser gewissen / solchs falls / vnschuldig /  
rein vnd sicher ist / vnd der Papisten gewissen schul-  
dig / vnrein vnd sorglich sein mus / Solas frölich her-  
gehen / vnd auffß ergest geraten / Es sey krieg odder  
auffrur / wie das selb Gottes zorn verhängen wil /  
Wird ein auffrur draus / So kan mich vnd die mei-  
nen / mein Gott vnd Herr Ihesus Christus woler-  
retten / wie er den lieben Lot errettet zu Sodom / wie  
er mich selbs auch errettet inn der nehesten auffrur / da  
ich inn aller fahr / leibs vnd lebens / mehr denn ein-  
mal / schweben muste / Vnd ich doch damit solchen  
dancß verdienet habe / bey den verzweuelten buben /  
Ich meine / die Papisten. Wil er mich nicht erretten /  
so sey im lob vnd dancß gesagt / Ich hab lang gnug  
gelebt /



gelebt / den tod wol verdienet / vnd meinen Herrn  
Christum am Bapstum redlich angefangen zu re-  
chen / Nach meinem tod / sollen sie aller erst / den Lu-  
ther recht fülen / Wie wol auch jetzt / wo ich in solchem  
Bepstischen vnd Pfeffischen auffrur ermordet wer-  
de / Do wil ich einen hauffen Bisschoff / Pfaffen vnd  
Münche / mit mir nemen / das man sagen sol / Doctor  
Martinus sey mit einer grossen Proceßion zum grabe  
bracht / Denn er ist ein grosser Doctor vber alle Bi-  
schoue / Pfaffen vnd Münche / darumb sollen sie auch  
mit im zum grabe gehen / auff dem rucken / das man  
dauon singen vnd sagen sol / Vnd wöllen also zur  
letze ein walfertlin miteinander thun / sie die Papisten /  
inn abgrund der helle zu irem lügen vnd morden  
Got / dem sie mit liegen vnd morden gedienet / Ich zu  
meinem Herrn Ihesu Christo / dem ich inn warheit  
vnd friede gedienet habe.

Denn es ist gut zu rechnen / Wer Doctor Luther  
im auffrur tödtet / das der nicht viel der Pfaffen scho-  
nen wird / So gehen wirs mit einander dahin / sie inn  
aller teuffel namen inn die helle / ich inn Gottes na-  
men zum himel / Es kan mir doch niemand schaden  
thun / das weis ich / so wenig als ich beger / jemand  
schaden zu thun / Aber so böse sollen sie es nicht ma-  
chen / ich wils noch erger mit in machen / Vnd so har-  
te köpffe sollen sie nicht haben / ich wil noch hertern  
kopff haben / Wenn sie gleich nicht allein diesen Kei-  
ser Carol / sondern auch den Türckischen Keiser für  
sich hetten / Sie sollen mich nicht verzagt noch er-  
schrocken machen / Sondern ich wil sie verzagt vnd  
erschrocken machen / Sie sollen mir hinfurt weichen /  
B - Ich



Ich wil in nicht weichen / Ich wil bleiben / Sie sol-  
len vntergehen / Sie habens zu weit versehen / Denn  
mein leben / sol jr henccker sein / Mein tod / sol jr teuffel  
sein / Des vnd kein anders / Das sollen sie erfahren /  
Vnd las sie nur itzt des getrost lachen.

Wird aber ein krieg daraus / So mus ich mich  
aber mal leiden / sampt den meinen / vnd gewarten /  
was vnser Gott hierinn raten vnd richten wird / Der  
vns bis her / trewlich beygestanden vnd noch nie ver-  
lassen hat. Vnd haben hierinn abermal grossen vor-  
teil / Erstlich / Wir sterben odder verderben / so haben  
wir des keinen schaden / Denn es stehet geschrieben /  
Selig sind die verfolgung leiden vmb der gerechtig-  
keit willen / Der das sagt / der leugt nicht / des sind wir  
gewis / So wissen vnd bekennen die Papisten selbs /  
vnd dancke in der Teufel / das sie anders sagen solten /  
das vnser lere widder keinen Artickel des glaubens  
noch widder die heilige schrift sey / Sondern sey wid-  
der irer kirchen brauch vnd der Bepste gesetzte / Dar-  
umb sie vns auch nicht mügen Ketzzer schelten / odder  
müssen lügen straffen jr eigen hertz vnd maul / weil  
keiner kan ein Ketzzer gescholten werden / der nicht  
widder die heiligen schrift odder Artickel des glau-  
bens leret / Viel weniger können sie vns als Ketzzer  
straffen odder bekriegen / Haben auch bis her / als die  
lügenere widder sich selbs / mörder vnd verrether /  
Lenhard Kesper vnd der gleichen / fur Ketzzer gelestert /  
verbrand / ermordet vnd verfolget / darüber sie auch  
noch keine rew odder busse haben / Sondern inn  
solchem blut vnd lügen verstockt bleiben / Wer solt  
sich denn fur solchen kriegern furchten ?

Zum an



Zum andern / So wissen wir / das sie solchen krieg  
nicht mügen inn Gottes namen anfaben / Können  
auch nicht beten / noch Gott vmb hülff anruffen.  
Vnd trotz sey in allen / beide semplich vnd sonder-  
lich geboten / das sie thürsten von hertzen zu Gott  
sagen / Hilff vns Gott inn dieser sachen / kriegem /  
Denn jr gewissen ist zu hoch beschweret / nicht allein  
mit lügen / lestern / blut / mord vnd allen greueln / son-  
dern auch vber das alles / mit verstocktem vnbusfer-  
tigem hertzen vnd sünden inn den heiligen geist. Dar-  
umb weil sie mit bösem gewissen vmb lesterlicher sa-  
chen willen kriegem / sollen sie auch kein glück noch  
heil haben / So wollen wir dazu einen segem vber sie  
sprechen / der sol also heissen / So frum jr fur Gott  
seid / vnd so gute sache jr habt zu kriegem / so gros  
glück vnd sieg gebe euch Gott / Amen. Vnd müsse  
euch gehen / wie es vns Deudschen gieng / da wir wi-  
der Sant Johannes Nus auch anfiengen den friede  
zu brechen vnd die Behemen bekriegten / vnd vns der  
Bapst auch auff die fleisch bancck opfferte / das wir  
im seine lust büssen musten / mit vnserm blut vnd köp-  
ffen / vnd stritten widder die warheit vnd gerechtig-  
keit / Wie jr itzt thut / auff das der Bapst abermal et-  
was habe inn die faust zu lachen / wenn er vnter vns  
ein solch lustig blutbad zugericht hat / der aller hei-  
ligste Vater vnd gütigste hirte vnser seelen / Gott kan  
aber wol etwa einen Juda Machabeum erwecken  
( ob gleich ich vnd die meinen still sitzen vnd leiden )  
der den Antiochum mit seinem heer / zur schmettere  
vnd recht kriegem lere / wie er vns an den Behemen le-  
rete kriegem vnd friede halten.

B ij

So wil



So wil ich auch sampt den meinen nicht feiren  
mit beten vnd flehen zu Gott/das er in gebe ein ver-  
zagt/blödes/feiges hertz/wenn sie zu felde ligen/das  
hie einen vnd dort einen/sein gewissen rüre vnd beisse/  
Vnd spreche / O we / o we / Ich bin inn ferlichem  
Kriege/ wir haben böse sachen / vnd streiten widder  
Gott vnd sein wort/Wie wills vns gehen? Wo faren  
wir hin? Vnd wenn sie denn sehen einen Macha-  
beischen daher ziehen gegen sie / das sie zu fliehen  
vnd zu stieben/wie sprech vom winde/Meinstu nicht/  
Gott könne solche kunst noch? wie er denn zu seinem  
volck spricht / Ich wil dir ein verzagt hertz geben/  
das/wenn du widder deine feinde eines weges aus-  
zeuchest/soltu durch sieben wege zu ruck fliehen/vnd  
ein rausschend blat sol euch schrecken / Warlich/ so  
thet er den verstockten Egyptern im roten meer auch/  
welche wol so steiff vnd sicher waren/als die Papi-  
sten sind/Noch da das stündlin kam/das jr gewissen  
sie rüret/sprachen sie/O we/laßt vns fliehen/Gott  
streit widder vns. Wer nicht weis/was da sey/mit  
bösem gewissen vnd verzagtem hertzen Kriegen/Wo-  
lan der versuchs itzt/wenn die Papisten Kriegen/so  
sol ers erfahren/ gleich wie es vnser vorfaren an den  
Behemen vnd Zitzka erfuren inn gleichem fall.  
Vnd vnser gebet/sol vns nicht heel haben/wollens  
anzeigen öffentlich/nemlich/der siebend Psalm/der  
an seiner ersten schlacht / das gantz Israel schlug/  
das zwentzig tausent man mit Absalom auff der  
walstat tod blieben/von einem kleinen heufflin er-  
schlagen/Denn er hat büchsen/puluer vnd harnisch  
gnug/Das weis ich gewis.

Zum dritten



Zum dritten/Weil mir nicht gebüret zu Kriegen  
noch zum Kriege zu raten odder zu reitzen/als einem  
Prediger im geistlichen ampt/Sondern viel mehr  
vom Kriege zum frieden raten/wie ich auch bis her  
auffß vleißigst gethan/das mir alle welt zeugen mus/  
Aber doch vnser feinde nicht wollen friede/sondern  
Krieg haben/Kompts denn dazu/das ein Krieg ange-  
het/So wil ich warlich meine fedder auch still hal-  
ten vnd schweigen/vnd mich nicht mehr so drein le-  
gen/wie ich thet inn der nehesten auffrur/Sondern  
wil auch lassen gehen/was da gehet/vnd solt gleich  
kein Bischoff/noch Pfaff/noch Münch bleiben/  
vnd ich selbs auch mit vntergehen/Denn jr trotzen  
vnd rhümen ist Gotte zu vnleidlich/vnd jr verstockt  
hertz machts zu hart vnd zu viel/Sie sind vber alle  
masse hoch gnug gebeten/ermanet/vnd vmb friede  
ersucht/Sie wöllens durch fleisch vnd blut hinaus  
trotzen/So wil ichs durch Geist vnd Gott auch mit  
in hinaus trotzen / Vnd hinfurt nicht einen odder  
zween Papisten/Sondern das gantz Papstum auff  
mich geladen haben/bis das der Richter im himel  
drein zeichne/Ich wil vnd kan mich fur solchen elen-  
den Gottes feinden nicht furchten/jr trotz ist mein  
stoltz/jr zürnen ist mein lachen/Sie können mir nicht  
mehr denn einen sack vol sieches fleisch nemen/Was  
ich aber in nemen kan/das sollen sie inn kurtz erfa-  
ren.

Weiter/Wo es zum Kriege kompt/da Gott fur  
sey/So wil ich/das teil/so sich widder die mördische  
vnd blutgyrige Papisten zur were setzt/nicht auffrü-  
risch gescholten haben noch schelten lassen / Son-  
dern/wills lassen gehen vnd geschehen/das sie es eis

B ij ne not



ne not were heissen / vnd wil sie damit ins Recht vnd zu den Juristen weisen / Denn inn solchem fall / wenn die mörder vnd bluthunde / ihe Kriegen vnd morden wollen / so ist's auch inn der warheit keine auffrur / sich widder sie setzen vnd weren / Nicht / das ich hie mit wölle jemand reitzen noch erwecken / zu solcher gegenwere / noch sierechtfertigen / denn das ist meins ampts nicht / viel weniger auch meines richtens oder der vrteils / Ein Christ weis wol was er thun sol / das er Gott gebe / was Gottes ist / vnd dem Keiser auch / was des Keisers ist / Aber doch nicht den bluthunden / was nicht ir ist / Sondern / das ich ein vnterschied gebe / zwiffchen auffrur vnd andern thaten / Vnd den Bluthunden / den schand deckel nicht lassen wil / das sie rhümen solten / als kriegten sie widder auffrurische leute / vnd hettens guten fug nach weltlichem vnd Göttlichem rechte / wie sich das ketzlin gern putzen wolte vnd schmücken / Des gleichen wil ich der leute gewissen nicht beschweret lassen / mit der fahr vnd sorge / als sey ir gegen were auffrurisch / Denn solcher name ist zu böse vnd zuschwer inn solchem fall / Es sol einen andern namen haben / Den werden die Rechte wol finden.

Man mus nicht alles auffrurisch sein lassen / was die bluthunde / auffrurisch schelten / Denn damit wollen sie aller welt / das maul vnd die fauss binden / das sie niemand / weder mit predigen straffen / noch mit der fauss sich weren solle / vnd sie ein offen maul vnd freie hand behalten / Wollen also durch den namen der auffrur alle welt schrecken vnd fahen / sich selbs aber trösten vnd sicher machen / Mein lieber gesell /  
ma n



man müst dir / die definition vnd deutung anders fur/  
legen. Auffrur ist nicht / wenn einer widder das Re/  
cht thut / Sonst müsten alle vbertretung des Rech/  
ten / auffrur heissen / Sondern der heisst ein auffrurer /  
der die Oberkeit vnd Recht nicht leiden wil / sondern  
greiff sie an vnd streit widder sie / vnd wil sie vnter/  
drucken / vnd selbs Herr sein vnd Recht stellen / wie  
der Müntzer thet ( Aliud est inuasor / aliud transgres/  
sor ) Das heisst recht ein auffrurischer / Das also die  
gegen were widder die bluthunde / nicht auffrurisch  
sein kan / Denn die Papisten fahen an vnd wollen  
Kriegen / vnd nicht friede halten / noch den andern  
lassen / die doch gerne friede hetten / Das also die Pa/  
pisten / dem namen vnd der tugent / so auffrur heisst /  
viel neher sind.

Denn sie haben gar kein recht / weder Götlich noch  
weltlich / fur sich / Sondern handeln aus bosheit /  
widder alle Götliche vnd weltliche recht / als / die  
mörder vnd bösewicht / Das ist leichtlich zu bewei/  
sen / Denn sie wissen selbs wol / das vnser lere recht  
ist / vnd wollen sie doch ausrotten / wie denn ein gros/  
ser Niclas Bisschoff zu Augspurg selbs gesagt hat /  
Er möchte leiden / das allenthalben so gehalten wür/  
de / wie zu Wittemberg / Aber das aus dem loch vnd  
winckel / solche lere solt anfahen vnd austomen / das  
sey nicht zu leiden / Wie dunckt dich ? Sind das nicht  
feine Bisschoffliche wort ? Des gleichen hat der Be/  
pstlich Legat Cardinal Campegius / auch bekand /  
Er kündte wol solche lere zu lassen / Aber / Es wür/  
de ein gros exempel draus werden / das man es an/  
dern Nation vnd Königreichen auch müste zu lassen /  
das sey



das sey aber nicht leidlich / Vnd ein ander grosser  
Bischoff auch gesagt / von iren gelereten / also / Vn-  
ser geleerten verteidigen vns fein / Sie bekennen  
selbs / das vnser ding nicht gegründet sey inn der  
schriff / Also / das sie fast wol wissen / das vnser lere  
nicht vnrecht / sondern inn der schriff gegründet sey /  
Vnd doch mutwilliglich vns verdamnen vnd die le-  
re ausrotten wollen / widder Göttlich Recht vnd war-  
heit.

Das sie aber auch widder Keiserlich vnd natür-  
lich recht handeln / ist offenbar / Denn sie haben erst-  
lich vnser teil / schwerlich zu verhör komen lassen /  
Darnach / da sie jr langsam / faule widderrede münd-  
lich drauff gethan / haben sie schlecht des kein ab-  
schriff wollen von sich geben / noch zur verantwort  
vns komen lassen / wie die fleddermense das liecht ge-  
scheret / bis auff diesen tag / Nu ist ja beide Gött-  
lich / Keiserlich vnd natürlich recht / welchs auch der  
heide Portius vber S. Paul widder die Juden hielt /  
das man solle nicht verdamnen / man höre denn zu-  
vor die antwort des verdampften / Denn Gott wolt  
Adam auch nicht verdamnen / Er foddert in zuvor  
zur antwort. Wir aber sind itzt zu Augspurg willig-  
lich erschienen / vnd zur antwort vns mit aller demut  
vnd vleis erboten / Vnd ist vns doch mit allem frenel  
vnd mutwillen abgeschlagen / Ist auch ire widderre-  
de / wie hoch vnd viel wir drumb baten / vns nicht zu-  
gestellet / vnd sind gleich wol verdampft von den  
heiligen Vatern inn Gott / vnd von den Christlichen  
Fürsten / O feine Lerer / O schöne Richter / Die alle  
welt zwingen zu glauben / vnd thüren nicht an tag ge-  
ben / was



ben/was es sey/das man glauben sol/Ich sol glauben  
ben/vnd doch nicht wissen/was ich glauben sol/  
Ich mus irrig heissen/Aber man wil nicht anzeigen/  
warumb ich irre.

**D** ir vnseligen/alle/die ir auffß Papsts seiten  
seid gewesen zu Augspurg/Es werden sich ewer sche-  
men müssen ewiglich/alle ewer nach komen/vnd  
nicht frölich hören euch nennen/das sie solche vn-  
selige voffaren gehabt haben. Wenn wir das lie-  
cht geschewet/vnd nicht hetten wollen antworten/  
soltet ir die gewesen sein/die vns dazu gedrungen  
hetten/Nu komen wir/vnd wollen nicht allein  
gerne antworten/sondern/bitten/ruffen/schreien/  
das wir antworten mügen/verzeren darüber gros  
gut/verseumen viel mehr/vnd leiden alle schmach/  
spot/hon vnd fahr/vnd ir habt vns das alles schend-  
lich vnd bösslich gewegert/Also auch/wenn wir ewr  
fleddermaus odder nacht eule/nemlich/ewr widder-  
rede/nicht hetten begert/noch haben wollen/soltet  
ir die gewesen sein/die vns die selbigen/on vnsern wil-  
len hetten vberreicht vnd ausgelassen/Nu bitten wir  
drumb/klagen vnd foddern mit allem anhalten/vnd  
ir versagt ewr Widderrede/vnd schlägt vns ab vn-  
ser Antwort.

**D** des schendlichen Reichstages/des gleichen  
nie gehalten/vnd nie gehöret ist/vnd nimer mehr ge-  
halten noch gehöret werden sol/solcher schendlichen  
handlung halben/der allen Fursten vnd dem ganz-  
tzen Reich/ein ewiger schandfleck sein mus/vnd alle  
vns Deudschen fur Gott vnd aller welt schamrot  
C machet/



machtet / Was wil hie zu der Türck sagen vnd sein  
gantzes Reich / wenn sie solch vnerhörete handlung  
von vnserm Reich hören werden? Was werden die  
Tattern vnd Moscobiten dazu sagen? Wer wil hin-  
furt vnter dem gantzen himel sich für vns Deudsch-  
en fürchten / odder etwas redlichs von vns halten /  
wenn sie hören / das wir vns den verfluchten Bapst  
mit seinen laruen / also lassen effen / nerren / zu kinder /  
ja zu klötzen vnd blöchen machen / das wir vmb jr  
lesterlich / Sodomitisch / schendlich / leren vnd leben  
willen / so schendlich / ja vber vnd vber schendlich /  
jnn öffentlichem Reichstage widder recht vnd war-  
heit handeln? Es solt billich einen iglichen deudschen  
gerewen / das er deudsch geboren were / vnd ein deud-  
scher heissen sol.

Doch wil ich wol gleuben / das sie für sonder-  
licher grosser klugheit / solch jr Widderrede vnd fei-  
nes büchlin inne behalten / weil jr gewissen selbs wol  
fület / das es faul / lose / kalt ding ist / des sie sich sche-  
men müsten / wo es austeme vnd sich im liecht solt  
sehen lassen odder antwort leiden / Denn ich kenne  
die hochgelarten Doctores wol / die wol sechs woch-  
en drüber gekocht vnd gebrewet haben / Ob sie schon  
für den vnwissenden / der sachen mit plaudern eine  
nasen machen können / Wenns aber auff's papyr  
kompt / so hats widder hende noch füsse / Sondern  
ligt da vber einem wüsten hauffen / als hette es ein  
trunckenbold erans gespeyet / wie man das sonderlich  
jnn D. Schmid vnd D. Ecken schrifften sibet / Es wil  
doch widder klingen noch klappen / wenn sie mit  
schreiben dran sollen / Drumb vleissigen sie sich mehr  
des schreiens vnd plauderns.

So hab



So hab ich auch erfahren/Das/da die Bekentnis der vnsern gelesen ist/haben sich der widder teil viel verwundert vnd bekand/Es sey die lauter warheit/Man könne es mit der Schrift nicht widerlegen. Widderumb / da man ire Widderrede gelesen hat / haben sie die Köpffe nidder gehenckt / vnd mit geberden bekennet / das es faul vnd lose ding sey/ gegen der vnsern bekentnis/ Die vnsern aber vnd viel frumer hertzen/sind höchlich erfrewet vnd trefflich gesterckt/da sie gehöret/das ihene aus aller irer macht vnd kunst/die sie dazu mal mussten auffß höchst beweisen/nichts anders erfür wusten zu bringen/denn solche lose widderrede/der itzt/Gott lob/ein weib/ein kind/ein leye/ein baur/mans gnug ist widder zustehen/mit gutem grunde der schrift vnd warheit/Vnd das ist auch die rechte grundliche vrsache/warumb sie solche widderrede nicht wolten vberreichen/Es grauet den flüchtigen bösen gewissen fur in selbs/vnd mochten der warheit antwort nicht gewarten.

Vnd ist leichtlich zu mercken/das sie inn solcher zuuersicht gestanden/vñ diesen Reichstag angericht/das sie gewislich gemeinet haben/vnser teil solte nimmer so keck sein/das sie erscheinen würden/Sondern wo sie den Keiser persönlich inn Deudsch land brechten / würde jederman erschrecken vnd zu in sagen / Gnade herrn/was wollet jr haben? Da in das gefeilet/Vnd der Kurfurst zu Sachsen/der aller erste erschein/hilff Gott/wie begonsten in die hosen zu stincken / wie war da alle solche ire zuuersicht verirret/welch ein zusamen reiten vnd heimlich ratschlahen vnd raunen hub sich da/Vnd musste doch niemand

E ij wissen/



wissen / Christus selbs / vnd ich auch nicht / was die  
sachen weren / So wenig als wir vor diesem jar von  
der Fursten rotterey wusten. Aber das war die sum-  
ma endlich / wie man wege vnd stege fünde / weil die  
vnsern so freidig vnd frölich erschienen die aller er-  
sten / das sie ja nicht verhöret würden / Da das auch  
nicht gar sein kund / haben sie dennoch zu letzt / die  
ehre eingelegt / das sie ire lose widderrede / nicht thur-  
sten vberreichen / noch raum geben zu antworten.

Denn das vnuerschampt maul vnd blutdürstis-  
ger Sophist Doctor Eck / freilich jr furnemester Rat-  
gebe einer / hat sich mit offentlichen Worten hören  
lassen / fur den vnsern / Das / wo der Keiser hette dem  
Ratschlag / so zu Bononia beschlossen war / gefol-  
get / Vnd im einzug inn Deusch land / die Luthe-  
rissen mit dem schwerd flugs vnd frisch angegrif-  
fen / einen nach dem andern geköpfft / So were der  
sachen wol rat worden / Aber da er den Kurfursten  
zu Sachsen hette lassen durch seinen Kantzler reden  
vnd verhören / were solchs alles gehindert. Wie  
dunckt dich vmb solche Doctores vnd heilige Peter-  
wie voller liebe vnd warheit sticken sie? Also muste  
gleich wol eraus brechen / der heimliche Rat / so Bes-  
pstliche heiligkeit zu Bononia gehandelt hatte mit  
dem Keiser / Aber Welch ein fein spiel solte auch dar-  
aus worden sein / wo der Keiser / solchem Bepstlichen  
vnd Teufelischen ratschlag nach / hette die sache mit  
morden angegriffen / Da solt ein Reichstag worden  
sein / das widder von Bisschouen noch von Fursten  
ein finger nagel blieben were / sonderlich inn solcher  
ferlicher zeit / da alles so rege vnd wege stund / vnd als  
le welt



le welt eins gnedigen Reichstages wartet/wie denn  
die ausschreibung auch anzeigt vnd furwendet/vnd  
doch leider nicht so gehalten ist.

Es moecht aber jemand sagen/ Der Keiser hab  
solche widderrede ihenes teils den vnsern wollen vber  
reichen/so fern die vnsern sich verpflichten wolten/  
das es nicht außkeme odder offenbar wuerde. Das ist  
war / vnd ist also angemutet den vnsern / Aber hie  
greiffe vnd tappe doch jederman/ob er gleich weder  
sehen noch hören künde / was doch das fur leute  
sind/die jr ding nicht wollen noch thuren lassen ans  
liecht komen? Ists so kostlich ding vnd wol gegrün-  
det inn der schrift/wie sie schreien vnd rhümen/war-  
umb schewet es das liecht? Was hilffts/solche offent-  
liche sachen/so man doch bey in mus leren vnd hal-  
ten/fur vns vnd jederman zu verbergen? Ists aber  
vngegründet/vnd lose ding/Warumb haben sie denn  
lassen im ersten abschied/durch den Kurfursten zu  
Brandenburg/ausruffen vnd schriftlich von sich ge-  
ben/Es sey der vnsern bekenntnis mit der schrift vnd  
gutem grund verlegt? Wenn das war were vnd jr ei-  
gen gewissen sie nicht hierinn selbs lügenstraffet/ so  
hetten sie solch kostliche wol gegründte Verlegung  
nicht allein lassen lesen / Sondern auch schriftlich  
von sich gegeben vnd gesagt/ Da habt irs/trotz ders  
verantworte / Wie wir mit vnser bekenntnis gethan  
haben vnd noch thun.

Aber Christus mus warhafftig bleiben/da er sagt/  
Wer arges thut / der hasset das liecht / vnd kompt  
nicht ans liecht/auff das seine werck nicht gestrafft  
werden/  
E iij



werden/ Wer aber die warheit thut/ der kompt ans  
liecht/ auff das seine werck offenbar werden/ wie sie  
inn Gott geschehen sind. Diesem vrteil Christi nach/  
hat Gott die vnsern von diesem Reichstage mit sol-  
chen ewigen ehren komen lassen/ das auch das wid-  
derteil mus bekennen/ wie wir das liecht nicht gesche-  
wet/ sondern auff's aller freiest vnd frölichst gesucht  
vnd gewartet haben/ Sie aber widder mit solcher  
vnd ewiger schanden da gelassen/ das sie/ wie die  
nachteulen vnd fleddermense/ ja wie jr Vater der lü-  
gen vnd des mordes/ das liecht auff's aller schend-  
lichst vnd offenberlich geflohen vnd geschewet ha-  
ben/ vnd auff jr lose/ faule/ finster geschwetz/ der ant-  
wort nicht gewarten noch leiden mügen.

So ist das auch ein fein Christlich stücklin/ das die  
vnsern sich verpflichten solten/ da fur zu sein/ damit  
solch köstlich kunst vnd wolgegründte weisheit irer  
widerrede/ nicht außkeme noch offenbar würde.  
Wie gar hat doch Gott die Papisten verblindet vnd  
geschendet/ das sie wedder vernunfft noch scham  
mehr haben/ Wie ist's doch möglich/ ich wil schwei-  
gen/ wie billich/ sich verpflichten/ Ein solche schriffte  
heimlich zu halten/ die vnter so viel hende komen mü-  
ste/ vnd zuvor ein mal fur dem Reich gelesen ist. Vnd  
wo sie etwa hernach durch ihenes teil selbs were aus  
komen/ so müstes der vnsern schuld sein/ Aber solche  
flugheit vnd hübsche rencke mus die gottlose ver-  
nunfft suchen/ weil sie die warheit vnd das liecht nicht  
leiden mag/ Vnd künde auch sonst kein bessern bes-  
helff finden/ da mit sie im finstern bleiben möchte/  
vnd jr Widerrede nicht von sich geben müste/ Wo-  
lan/ so



lan/so bleibe sie im finsternis/wie sie ist/vnd sol auch  
im ewigen hellischen finsternis dazu bleiben / vnd  
doch am Jungsten gericht/wo es nicht ehe geschicht/  
allzu helle an tag komen.

Ja sprechestu/Ob sie wol ire Widderrede oder ver-  
legung/nicht haben von sich gegeben noch verant-  
worten lassen/So haben sie dafur einen ausschus ge-  
macht / etlichen Fursten vnd gelerten / beides teils/  
von der sachen vnternander freundlich zu handeln/  
befolhen / Ey putz dich / schmück dich ketzlin / Es  
werden vns geste komen/Wie alber vnd nerrisch ist  
der arme man Christus/der solche tücke so gar nicht  
mercken kan/Der Ausschus ist gehalten/das ist war/  
Aber was hat man drinnen gehandelt? Nichts  
vberal von irer verlegung odder widderrede / die ist  
im finstern blieben/Vnd der Ausschus musste die na-  
sen helffen machen/das ire lose verlegung/mit etwa  
einem glimpff / innebehalten vnd nicht eraus komen  
müste/Denn man hat im Ausschus nicht ire Verle-  
gung dargelegt/Sondern Unser bekenntnis furgeno-  
men vnd mit den vnsern darauff gehandelt/wie viel  
wir dauon nach lassen vnd widderruffen ( odder wie  
sie es deuten ) mit inen vns vergleichen wolten/Alles  
dahin geerbeitet vnd gericht/das sie mit grossen ge-  
limpff schreien möchten / Sehet/lieben leute/ höret  
alle welt/wie verstockt vnd halstarrig sind die Luthe-  
risschen/Erstlich ist ir bekenntnis mit schrift vnd wol-  
gegründten vrsachen verlegt / Darnach/ freundlich  
mit inen gehandelt/Was sol man mehr thun? Sie  
wollen nicht weichen/sie werden vberwunden odder  
freundlich vnterricht.

Wolan/



Wolan / das lügendeschrey / müssen wir lassen  
gehen / Es sol sie doch nicht helffen / das weis ich /  
So hat sie auch Gott bereit an inn solchem rhümen /  
lügendestraft / Denn da solcher abschied ist durch  
den Kurfürsten zu Brandenburg ausgeruffen vnd  
gegeben / das vnser bekenntnis sey mit schrift vnd gu-  
tem grund verlegt / habens die vnsern nicht angeno-  
men noch dazu still geschwigen / Sondern frey offent-  
lich fur dem Keiser vnd Reich / widersprochen vnd  
bezeugt / das vnser bekenntnis sey nicht verlegt / son-  
dern der massen gestellet vnd gegründet / das auch  
die hellischen pforten nichts da widder vermügen /  
Solche schlappen musten sie widder inn sich fressen /  
Denn es ist auff Deutsch so viel gesagt / Was der  
Kurfürst von Brandenburg im abschied ausgeru-  
ffen hat / das ist nicht war / sondern erlogen / Das ist  
recht / Denn die wolgegründte verlegung ist noch ni-  
cht am liecht / sondern schlefft villeicht bey dem alten  
Danhenser im Venusberge.

Weil nu das am tage ist / das sie ire Widderles-  
gung im finsternis behalten vnd nicht von sich ans  
liecht geben haben / So ist nicht allein das eine offent-  
liche vnnerschampte lügen / das sie furgeben haben /  
vnser bekenntnis sey mit schrift vnd gutem grunde  
verlegt / Sondern das ist des Teuffels selbs lügen  
maul / das sie noch dazu rhümen / vnd zu irem glimpff  
sich putzen vnd schreien thüren / das wir vberwun-  
den sind / vnd nicht wollen weichen / wie wol sie ir ge-  
wissen gewaltiglich solcher lügen vberzeuget. Das  
man allenthalben greiffen mus / wie sie zum glimpff  
geeilet / wie denn alle die thun / so böse sachen haben /  
vnd sich



vnd sich so jemerlich flicken vnd allerley rencke such-  
en/das ire böse sachen/ja nicht ans liecht kome/Vnd  
summa/offenbar wird/das sie an irer sachen verzagt/  
nichts wenigens sich versehen haben/denn das die  
vnsern komen vnd erscheinen würden/So gar haben  
sie sich auff lauter gewalt vertröstet/vnd auff keine  
warheit noch liecht sich gericht.

Wie freundlich sie es auch mit dem Ausschus ge-  
meinet haben/ist leichtlich an dem einigen stück zu  
mercken/das sie/vnter andern Artickeln haben den  
vnsern thüren annuten/Das wir von beider gestalt  
des Sacraments/solten also leren/Es seie nicht vn-  
recht/sondern recht/das man auch einerley gestalt  
alleine/gebe vnd neme/Wo wir das theten/als denn  
wolten sie vns widderumb zugeben vnd leren lassen/  
das wir beider gestalt geben vnd nemen möchten/  
Ist nicht das eine grosse freundschaft? Wer hette  
sich solcher liebe zu solchen leuten versehen? Bis  
her haben sie/fur Ketzer/alle die verfolget/vnd alle  
plage angelegt/so beider gestalt genossen haben/  
Izt aber wollen sie es Recht vnd Christlich/heissen  
vnd sein lassen/wo wir widderumb leren/das sie mit  
einer gestalt auch recht vnd Christlich handeln/Das  
heisst auff Deudsch/kalt vnd warm aus einem maul  
blasen/Es ist vnrecht/Vnd ist doch Vffrecht/was  
vnd wie sie wollen/Noch mus es nicht erlogen  
heissen.

Wo nu die vnsern solchs hetten bewilligt vnd  
angenomen/da solt sich allererst ein rhümen vnd  
schreien erhebt haben inn aller welt/Sehet lieben  
D leute/



leute / Die Lutherischen widderruffen ire lere / Vor  
hin haben sie gelert / Es sey vnrecht / einerley gestalt  
zu brauchen / Nu leren sie / Es sey recht / Nu höret jr /  
das wir recht geleret / vnd sie mit irem eigenem be  
kenntnis vnrecht erfunden sind. Also haben sie ver  
sucht / die trewen einfeltigen leute / mit diesem einigen  
stücke / alle ire greuel vnd Teuffels thand zu besteti  
gen / vnd vns als widderruffer aller vnser lere zu schül  
digen. Zu dem / hetten sie inn vnsern kirchen / ire  
giffrige lere / durch vnsern eigen mund auffgericht /  
vnd gleich wol daneben inn iren kirchen / vnser lere  
mit gewalt geweret / das jr mund vnser lere bey jnen  
nichts hette geleret / Wolten sich also inn vnser kirch  
en dringen vnd pflantzen / durch vnsern eigen mund /  
vnd gleich wol vns allzu mal aus iren kirchen schlies  
sen. Sind es nicht feine / freundliche / gleiche mittel /  
die zur freundlichen handlung wol dienen?

Aber wie die Verlegung ist / so ist der Ausschus  
auch / Die Verlegung ist eine finster nachteule / vnd  
wil nicht ans liecht. Der Ausschus ist / eitel list vnd  
falscher betrug / Vnd wie warhafftig vnd löblich der  
rhum ist / das sie vnser bekenntnis mit schrift vnd gu  
tem grund verlegt haben / So warhafftig vnd red  
lich ist auch der rhum / das sie freundliche handlung  
furgewendet haben / Beides eitel lügen vnd teuffche  
rey / Sie wolten sich freilich nicht gern / das wir also mit  
jnen solten handeln. Aber ich hab itzt nicht furge  
nomen vom handel dieses Reichstages zu schreiben /  
noch ire Verlegung anzugreifen / Sol aber / wills  
Gott / auch geschehen / Sondern wil allein dis mal  
haben angezeigt / wie die Papisten keinen friede / keine  
warheit /



warheit/keine ruge wollen haben/Sondern mit dem  
kopff hindurch / vnd entweder einen Krieg odder  
Aufffur stifften / es sey vns lieb odder leid / da wil  
nichts fur helffen / Wir aber müßens wogen vnd  
warten/weil vnser erbieten/slehen vnd schreien vmb  
friede / nicht wil erhöret werden/ noch vnser demut  
vnd gedult etwas gelten / So las her faren / was  
nicht bleiben kan.

Aber weil ich der Deutschen Prophet bin (Denn  
solchen hoffertigen namen mus ich mir hinfurt selbs  
zu messen/meinen Papisten vnd Eseln zur lust vnd  
gefallen) So wil mir gleich wol/ als einem trewen  
Lerer/gebüren/meine lieben Deutschen zu warnen/  
fur irem schaden vnd fahr/vnd Christlich vnterricht  
zu geben / wes sie sich halten sollen / wo der Keiser  
durch seine Teuffel die Papisten verhetzt/auffbieten  
würde zu kriegen widder vnser teils Fürsten vnd  
Stedte/Nicht/das ich Sorge/ Keiserliche Maiestet/  
werde solchen gifftblasern folgen / vnd solchen vn-  
billichen Krieg anfahen/Sondern/das ich das mei-  
ne nicht verseumen/vnd allenthalben auff alle eben-  
theur/mein gewissen entschuldigt vnd vnbeschweret  
erhalten wil/Denn es ist mir viel lieber/eine vberige  
vnd vnnötige vermanung vnd warnung gestellet/vnd  
vergebliche bericht gethan / Denn das ichs verseu-  
met/vnd wo es anders gienge / denn ich mich ver-  
messen hette/darnach zu langsam keme / vnd nicht  
mehr hette/das mich tröstet / denn das wort / Non  
Putassem/Ich hetts nicht gemeinet/Es ist (sprechen  
die Weisen) auch zu sorgen/wenns gleich sicher ist/  
Wie viel mehr ist itzt inn solchen seltzamen leufften/

D ü so der



so der Papisten wüten/Gottes zorn so gewolich reizt/  
Keinem w inde noch wetter zu trawen / es sehe wie  
freundlich es wolle/Vnd Paulus Rom.xij. auch ge-  
bent/Das die sorgen sollen/so andern furstehen.

Welcher Deudscher nu meinem trewen rat fol-  
gen wil/der folge/Wer nicht wil/der lasse es/Ich  
suche hie mit nicht das meine / Sondern ewer / der  
Deudschen heil vnd seligkeit. Mir künd fur meine  
person nicht bas geschehen/denn das mich die Pa-  
pisten fressen / zurissen / zubissen / odder wie sie mir  
sonst / aus dem sundlichen / tödlichen madensack /  
hölffen/Ich spreche doch/wenn sie auff's höchst zür-  
nen/Lieben Herrn/Zürnet jr/so gehet von der wand/  
Thut inn ewr badekleid vnd hengers an den hals/  
Vnd wil kurtz vmb von inen vngepocht vnd vnge-  
trozt sein / Denn ich weis/wo meine sache stehet/  
vnd wo ich bleiben sol/Gott sey gelobt/Wügen sie  
meinen dienst nicht zu irem besten annemen / So  
dancke in der leidige Teufel/wo sie mir ein tröpflin  
liebe odder gnade erzeigen / Dürffen sie meiner lere  
nicht / So darff ich irer gnaden viel weniger / vnd  
lasse sie zürnen vnd toben/inn aller Teufel namen/  
So lache ich inn Gottes namen.

Das ist aber mein trewer Rat/das/wo der Kei-  
ser würde auffbieten/vnd widder vnser teil vmb des  
Bapsts sachen odder vnser lere willen/Kriegen wolt/  
als die Papisten itzt gewolich rhümen vnd trotzen  
(ich mich aber zum Keiser noch nicht versehe) das  
inn solchem fall/kein mensch/sich dazu gebrauchen  
lasse/nach dem Keiser gehorsam sey/Sondern sey  
gewis/



gewis/das im von Gott hart verboten ist/in solch  
em fall/dem Keiser zu gehorchen/Vnd wer im ge  
horchet/das der wisse/wie er Gott vngehorsam/vnd  
sein leib vnd seel ewiglich vertriegen wird/Denn der  
Keiser handelt als denn nicht allein widder Gott  
vnd Göttlich recht/sondern auch widder seine eigen  
Keiserliche recht/ eyde/ pflicht/ siegel vnd briene/  
Vnd das du nicht denckest/Solchs sey mein getichte  
odder ich gebe aus meinem kopff/ dir solchen rat/  
So wil ich dir vrsachen vnd grund so starck vnd klar  
anzeigen/das du greiffen solt/Es sey nicht mein rat/  
Sondern Gottes ernstlichs vnd manchfeltiges stren  
ges gebot/fur welchs zorn/du billich erschrecken solt/  
vnd endlich auch erschrecken must.

Erstlich mus ich den Lieben Keiser Carol ent  
schuldigen seiner person halben / Denn er hat bis  
her/auch itzt auff dem Reichstage/also sich erzeigt/  
das er aller welt gonst vnd liebe vberkomen hat/  
vnd würdig were/das im kein leid widerfüre/Auch die  
vnsern/nichts anders/denn Keiserliche tugent vnd  
lob von im zusagen wissen. Vnd das ich des alles et  
liche exempel anzeige/So ist das ja eine wunderliche  
seltzame sanfftmüt /das seine Keiserliche Maiestet/  
vnser lere nicht hat wollen verdamnen / ob sie wol  
von geistlichen vnd weltlichen Fursten / hefftiglich  
darauff gehetzt vnd gereitzt ist / mit vnableslichem  
anhalten/auch ehe er aus Spanien komen ist/Aber  
seine Maiestet hat gestanden/wie ein fels/vnd zum  
Reichstage geeilet/vnd ein gnedigs ausschreiben ge  
than / willens/die sachen gütlich vnd freundlich zu  
handeln/Sol auch gesagt haben. Es müsse ia nicht

D i j            so gar



so gar böse lere sein/weil so viel/grosser/hoher/ge-  
lerter/vnd redlicher leute solchs annemen.

Welchs sich auch also erfunden hat zu Aug-  
spurg/da vnser bekenntnis fur Keiserlicher Maiestet ist  
gelesen worden / haben das widderteil selbs erfun-  
den/das diese lere nicht so böse sey/als sie durch ire  
gifftigen prediger vnd ohren bleser/vnd heffige Für-  
sten/ist furgebildet/ Ja sie hatten sichs gar nicht ver-  
sehen/das so eine gute lere sein solt/haben ir viel selbs  
bekennet/Es sey die lauter heilige schrift/man kön-  
ne sie mit der schrift nicht widerlegen/Des sie gar  
viel anders zuuor bericht waren gewesen / Das war  
auch die vrsache/ warumb man schwerlich zu lies/  
das sie gelesen ward/Denn die Neidfürsten vnd giff-  
tige lügener forgeten wol/wo sie gelesen würde/das  
ire gifftige lügen müsten zuschanden werden/hetten  
gern gesehen/das Keiserliche Maiestet stracks vnge-  
lesen vnd vngehört alles verdampt hette / Aber da  
seine Keiserliche Maiestet nicht kundte erhalten/das  
man sie öffentlich fur jederman lesen liesse/Thet sie  
dennoch so viel/das man sie fur den Reichstenden  
lesen vnd hören muste/wie hoch auch solchs andern  
Fürsten vnd Bischouen vnd Sophisten widder war/  
vnd sie bitterlich verdros.

Vnd wie wol gros gelt auff dem Reichstage ver-  
zeret ist/Vnd scheint/als sey nichts ausgericht. So  
sage ich doch fur mich / das / wenn schon noch  
zweimal mehr verzeret were/So were allein mit dem  
stück alles reichlich bezalet vnd gnug ausgericht/  
Das Jungher Neidhard/vnd Meister lügenhard/  
inn iren



inn irem neiden vnd liegen zu schanden worden sind/  
Vnd haben müssen sehen vnd hören/das vnser lere/  
nicht widder die schrift noch artickel des glaubens er-  
funden ist/welche sie doch zuvor mit liegen vnd nei-  
den allenthalben/durch schrift/predigen vnd affter-  
reden/so greulich gemacht haben/als sey nie kein er-  
ger lere an tag komen/Solcher Neid/sage ich/ist auff  
dem Reichstage geschendet vnd solche lügen offen-  
bar worden/ Derhalben wir vnserm lieben Keiser  
Carol hold sollen sein vnd dancken fur diese tugent/  
das Gott durch in/zum anfang/Vnser lere hat ge-  
schmückt vnd erlöset von den lügenhafftigen/lester-  
lichen titeln der ketzerey vnd ander schendlichen na-  
men/ Vnd also die lügener vnd neider gar redlich  
auff's maul geschlagen/ Wie wol sie ein eisern stirn  
haben vnd sich nicht schemen/Schadet aber nicht/  
Der anfang ist vns gut sat/Es sol wol besser werden.

Item/Keiserliche Maiestet/sol auch gesagt ha-  
ben/Wenn die Pfaffen frum weren/so dürfften sie  
keines Luthers/Was ist das anders gesagt. Denn  
wie Salomo sagt/Des Königes lippen weissagen/  
Denn seine Maiestet wil damit so viel anzeigen/das  
der Luther sey der Pfaffen rute/vnd habens auch wol  
verdienet/vnd seien nicht recht inn irem wesen/Das  
ist auch gnugsam bekennet/von in selbs/Denn der  
Bischoff zu Saltzburg hat zu Magister Philippus  
gesagt/Ach/was wolt jr doch an vns Pfaffen refor-  
mieren/Wir Pfaffen sind nie gut gewest. Da sihe  
doch vnd höre die frumen lente/Sie wissen vnd be-  
kennen/das sie böse sind vnd vnrecht haben/wöllien  
dazu auch so bleiben vngereformirt sein/vnd der  
offent



Öffentlichen warheit nicht weichen / Vnd schreien  
doch / vnd ruffen / Keiser vnd alle Fürsten an / man  
solle für sie kriegen vnd schirmen / Was ist das anders  
gesagt / denn so viel : Lieber Keiser / lieben Deusch-  
en / kriegt / vergißt ewr blut / setzt dran all ewr gut / leib /  
Kind vnd weib / auff das jr vns beschützet inn vnsern  
schendlichen teuflischen leben vnd wesen / widder die  
Warheit / die wir wol wissen / aber doch nicht leiden  
können / vnd vns auch nicht bessern wollen / Wie  
düncck dich : Wenn du für solche leute kriegest vnd  
dein blut vergeussst / bistu nicht ein schöner marterer /  
vnd hast dein blut vnd gut fast wol angelegt :

Item / da die vnsern / hatten ire antwort wollen  
Keiserlicher Maiestet vbergeben / widder der Sophi-  
sten verlegung / so viel man von der selben noch der  
verlesung hatte behalten / Vnd Keiserliche Maiestet  
itzt mit der hand darnach greiff vnd wolt sie an ne-  
men / Da zuckt der König Ferdinandus / Keiserlicher  
Maiestet hand zu rück / das solch antwort nicht mu-  
ste angenommen werden / Daraus aber mal wol schei-  
net / wer die leute sind / die vnter Keiserlicher Maiestet  
namen iren has vnd neid treiben / So doch Keiser-  
liche Maiestet wol anders gesinnet vnd geneigt were.

Item / da der Kurfürst zu Brandenburg im ab-  
schied mit trefflichen / prechtigen / trotzigem worten /  
hatte beschlossen / Wie Keiserliche Maiestet / Fürsten  
vnd stende des Reichs sichs vereinigt hetten / das sie  
land vnd leute / leib vnd gut vnd blut dran setzen wol-  
ten / für welchen worten / die vnsern solten erschrecken /  
Aber weil nicht da bey geredt ward ( ob Gott wil )  
blieben



blieben es wort/vnd vergiengen mit dem hall/da der  
aus war/Da furcht sich auch niemand / Doch hatte  
Keiserliche Maiestet hie abermal sich mercken lassen/  
vnd solchen Redener/zwar nicht heissen liegen/Son-  
dern gesagt/ Es were zu viel geredt/Vnd gewonnen  
viel andere grosse Fürsten vnd Herrn/hie zu schaffen/  
wie sie solche wort glosiern möchten / Etlich gaben  
fur/Es solte die meinung sein/Wo vnser teil wolte je-  
mand ihenes teils mit gewalt angreifen/So wolten  
sie leib vnd gut/blut/land vnd leute zu samen setzen/  
So doch vnser teil solchs nie mals gedacht/Sondern  
allzeit vmb friede gebeten vnd geschrien haben/wie  
sie selbs allesampt auff's aller beste wissen/Etlich aber  
offentlich fur dem Keiser bezeugt / das sie inn solche  
rede des Marggrauen/nie gewilligt hetten/were auch  
jre meinung nichts vber all.

Wie wol/land vnd leute sind mit dem maule bald  
genennet/Aber/ob man mit der faust der selbigen so  
mechtig sey / zu blut / leib vnd gut auffzusetzen / on  
not/dazu widder Gott vnd recht/das solt ja die erfa-  
runge wol lernen / Ich acht / Man wird sie zum we-  
nigsten zuuor drumb fragen/vnd solch furhaben vn-  
angezeigt nicht lassen / So stehets auch drauff / das  
Gott nicht allzeit geben vnd thun mus/was wir den-  
cken vnd sagen thüren/Es hat wol grössern Herrn ir  
maul jemerlich gelogen/vnd jre anschlege sie schend-  
lich betrogen/Aber das best ist/das sie Gott nicht da-  
zu anruffen odder sein doch gedechten / wenn sie so  
trotzen vnd pochen. Doch spüret man hierinn / des  
Keisers hertz / das er nicht so ein toller bluthund ist/  
Vnd jm solche trotzige wort vnd werck nichts gefal-  
len.

E Aber/



Aber / Es mus dem lieben Keiser gehen / wie allen  
frumen Fürsten vnd Herrn / Denn wo ein Fürst nicht  
ein halber Teuffel ist / Sondern mit der senfft regiern  
wil / da kans nicht anders sein / Es komen die grösser  
sten schelcke vnd bösewichter ins Regiment vnd inn  
die Empter / die thun denn / was sie wollen / vnter des  
Fürsten namen / Denn sie dürffen sich nicht furchten /  
weil sie wissen / das der Fürst frum ist vnd lesst im gern  
sagen / Was solt nu dieser frume Keiser vermügen /  
vnter so viel schelcken vnd bösewichten / sonderlich ge  
gen den Ertzbösewicht Bapst Clemen / der aller  
schalckheit vol steckt / vnd bisher auch redlich am Kei  
ser beweiset hat? Ich D. Luther bin gelerter inn der  
schriffte denn der Keiser / auch mehr erfahren inn teg  
licher vbung / Noch sorge ich / wo ich vnter so viel  
schelcken sein solte / vnd imer hören jr giffrige zungen /  
vnd dagegen kein ander vnterrichtung / Ich würde  
in warlich auch allzu frum sein / vnd sie würden mich  
inn etlichen stücken vberteuben / wie mir denn offft ge  
schehen ist / durch etliche geister vnd flüglinge.

Darumb sol sich des niemand verwundern noch  
entsetzen / ob vnter des Keisers namen verbot odder  
briene ausgehen / widder Gott vnd Recht / Er kans  
nicht weren / Sondern sol gewis sein / das solchs al  
les ist ein getrieb des obersten schalcks inn der welt /  
des Bapsts / der solchs durch seine plattenhengst vnd  
heuchler anrichtet / ob er vnter vns Deudschen künd  
te ein blutbad stifften / das wir zu boden giengen /  
Vnd glaube fur mich / Wo ers nicht wird durch die  
sen Keiser enden / So wird er sich zum Türckischen  
Keiser schlagen / vnd vns den selbigen auffladen / Da  
selbst



selbst werden wir denn finden / das gelte / so wir dem  
Papist / für sein Ablass vnd Krenerey so viel jar her ge-  
geben haben / zum schatz widder den Türcken Krieg.

Das sey dis mal gnug gesagt von entschuldigung  
des Keisers / Wollen nu die warnung thun / vnd vr-  
sachen anzeigen / darumb sich ein iglicher billich sol  
schewen vnd furchten / inn solchem fall / dem Keiser  
zu gehorchen vnd widder vnser teil zu Kriegen / Vnd  
sage aber mal / wie droben / das ich niemand wil ra-  
ten noch hetzen zu Kriegen / Meins hertzen wunsch  
vnd bitte ist / das man friede halte / vnd kein teil Krieg  
anfahet noch vrsachen dazu gebe / Denn ich wil mein  
gewissen vnbeschweret haben / vnd den namen wed-  
der für Gott noch der welt tragen / das aus meinem  
rat odder willen / jemand Kriege odder sich were / aus-  
genommen die ihenigen / denen es befolhen ist / vnd  
recht dazu haben / No. xiiij. Wo aber der Teuffel die  
Papisten so gar besessen hat / das sie nicht wöllen  
noch können friede haben noch leiden / vnd wöllen  
schlechts Kriegen odder vrsachen dazu geben / Das  
sol auff irem gewissen ligen / Ich mus es lassen ge-  
schehen / weil mein weren nicht gelten noch helffen  
wil.

Die erste vrsache / das du inn solchem fall / dem  
Keiser nicht solt gehorsam sein vnd Kriegen / ist diese /  
Das du (so wol als der Keiser selbs auch) inn der  
Taufe geschworen hast / das Euangelion Christi  
zu halten / vnd nicht zu verfolgen noch zu bestreiten.  
Nu weistu ja / das der Keiser dieses falls / durch den  
Papist gehetzt vnd betrogen wird / widder das Euan-  
gelion Christi zustreiten / Weil vnser lere zu Augspurg

L ij öffentlich



offentlich erfunden ist/das sie das recht Euangelion  
vnd die heilige schrift sey. Vnd du solt also sagen zum  
auffbot des Keisers odder deines Fürsten/ Ja lieber  
Keiser/ lieber Fürst / wenn du deinen eyd vnd pflicht  
inn der Tauffe gethan/heltest/ So soltu mein lieber  
Herr sein/vnd wil dir gehorsam sein zu kriegen/wenn  
du wilt / Wiltu aber dein Tauffepflicht/vnd Christ/  
lichen bund mit Christo gemacht/nicht halten/son/  
dern verfolgen/ So sey dir ein schalck an meiner stat  
gehorsam/ Ich wil vmb deinen willen nicht meinen  
Gott lestern vnd sein wort verfolgen/vnd so frech inn  
abgrund der hellen mit dir rennen vnd springen.

Diese erste vrsache begreiff in sich viel andere grosse  
schreckliche vrsachen/ Denn/ Wer widder das Euan  
gelion sicht vnd streit/der mus auch zu gleich streiten  
widder Gott/widder Ihesum Christum/widder den  
Heiligen geist/widder das theure blut Christi/wid/  
der sein sterben/widder Gottes wort/widder alle ar/  
tikel des glaubens/widder alle Sacrament/widder  
alle lere / so durchs Euangelion gegeben/bestettigt  
vnd erhalten werden/als von der oberkeit vnd welt/  
lichem friede vnd stenden/Vnd Summa/widder alle  
Engel vnd heiligen/widder himel vnd erden vnd alle  
Creaturn / Denn/ Wer widder Gott streit / der mus  
widder alles streiten / das Gottes ist odder das mit  
Gott hellt/Was aber das zu letzt fur ein ende würde  
nemen/würdestu wol gewar werden. Vnd das noch  
erger ist/Solchs streiten geschehe wissentlich / Denn  
man weis vnd bekennet/das diese lere sey das Euan/  
gelion/ Der Türck vnd die Tattern/wissen ja nicht/  
das es Gottes wort sey/Darumb kan kein Türcke so  
böse



böse sein / als du / Sondern du must zehen mal tieffer  
verdampft werden / denn alle Türcken / Tattern / Hei-  
den vnd Jüden.

Wie wol es ein schreckliches ding ist / das bey den  
Christen dahin komen ist / das man solcher warnung  
bedürffen mus / gerade / als wüsten sie selbs nicht / wie  
ein greulich schrecklich ding es sey / wissentlich / wid-  
der Gott vnd sein wort streiten / Das ist ein zeichen /  
das bey den Christen wenig rechter Christen / vnd viel  
erger Türcken vnter in sein müssen / denn inn der Tür-  
ckey odder inn der helle dazu / Doch die rechten Chri-  
sten / ob jr gleich wenig sind / wissens selbs wol / Dür-  
ffen auch solcher warnung nicht / Sondern die Papi-  
sten / welche den namen vnd schein der Christen / mit  
allen schanden füren / vnd sind doch zehen mal erger  
denn die Türcken / Die mus man warnen / Wilffts /  
so ist gut / Wilffts nicht / So sind doch wir entschül-  
digt / vnd ist jr straffe deste grösser / Denn der Türck ist  
so vnfinnig nicht / das er widder seinen Mahometh  
noch widder seinen Alkoran streite oder tobe / wie vn-  
ser Teufel thun / die Papisten / vnd widder jr eigen  
Euangelion / das sie fur recht erkennen / wüthen vnd  
toben / Vnd machen damit / den Türcken / gegen in /  
zum lauter heiligen / vnd sich zu rechten teufeln.

Die Ander ursache ist / Wenn gleich vnser lere  
nicht recht were ( wie sie doch alle anders wissen ) So  
solt dich doch alleine allzu seer das abschrecken / das  
du mit solchem streiten / auff dich ladest / dich teils  
hafftig vnd schuldig machest fur Gott / aller der gre-  
wel / die im gantzen Papstumb begangen sind vnd

R ij furt be



furt begangen werden. Diese vrsache begreiff inn  
sich vnzelige greuel vnd alle bosheit/sünd vnd scha-  
den/Kurtz/es ist die grundlose helle hie selbs/mit als  
len sünden/welcher du must aller teilhafftig sein / wo  
du dem Keiser gehorsam bist / inn diesem fall / Aber  
wir wollen der selbigen doch etliche erzelen vnd fur  
die augen stellen / auff das sie nicht so vergessen wer-  
den/Denn die Papisten wolten sich wol gern putzen  
vnd solche greuel vnter die bancck stecken/vngebüffet  
vnd vngeschert/bis zur zeit/da sie die selbigen künde-  
ten widder erfur zihen vnd auffrichten.

Die mustu zu erst auff dich laden alle das schend-  
liche leben / das sie gefüret haben vnd noch füren/  
Denn sie gedenccken keines zu bessern / Sondern du  
solt dein blut vergiessen / vnd dein leben wogen / das  
ir verflucht vnuerschampt leben/geschützt vnd erhal-  
ten werde / Da kompt denn auff deinen hals vnd  
gewissen/alle die hürerey/ehebrecherey vnd vnzucht/  
so inn den Thümen vnd Stifften/bis her vnd noch/  
geübet sind/Vnd mus dein hertz solchen rhum vnd  
ehre haben/das es habe gestritten/fur die grösssten  
vnd meisten hurn vnd buben / so auff erden sind / ir  
hurn vnd buben leben zu bestettigen/vnd dich des al-  
les teilhafftig zu machen / O das ist dir denn ein schö-  
ner rhum vnd feine vrsache/dein leben zu wogen vnd  
Gotte zu dienen / Denn sie bessern solch leben nicht/  
könnens auch nicht bessern/Sintemal es vnmüglich  
ist/das so viel tausent personen solten kensch leben/  
wie sie doch fur nemen.

Über das/müste auch auff dich laden/die Bepst-  
lichen



lichen vnd Cardinaliſſchen Keuſcheit / Welche iſt eine  
beſondere Keuſcheit / vber die gemeinen geiſtlichen Keu  
ſcheit / vnd heiſſt auff Welſch / Pufferonen / nemlich /  
die Sodomitiſche vnd Gomorriſche Keuſcheit / Denn  
alſo muſte Gott ſeinen feind vnd widderſacher / den  
Bapſt vnd Cardinel fur andern / blenden vnd pla  
gen / das ſie nicht werd blieben / mit weibsbilden na  
türlichher weiſe zu ſündigen / Sondern irem verdienten  
lohn nach / jr eigene leibe vñ perſonen durch ſich ſelbs  
ſchenden / Vnd dazu inn ſolchen verkereten / verſtock  
ten ſinn geraten / das ſie ſolchs fur keine ſünde hielten /  
Sondern damit ſchertzen / als were es ein Karten  
ſpiel / darüber ſie lachen vnd frölich ſein mügen / on  
fahr / O dem hier iſt recht gegeben / darumb giebrt  
vnd ſcheumet es ſo wol ( wie Judas ſagt ) alle ſchan  
de vnd laſter heraus. Gehe nu hin vnd ſetze dein le  
ben dran / vnd ſtreite fur ſolche vnbusfertige / vnuer  
ſchampte Pufferonen / die zu ſolchen leſterlichen ſün  
den noch lachen vnd damit ſchertzen.

Ich liege dir hie nicht / Wer zu Rom geweſt iſt /  
der weiſ wol / das leider erger iſt / denn jemand ſagen  
noch glauben mag. Da das neheſt Concilium Latera  
nenſe zu Rom vnter dem Bapſt Leo / ſolt beſchloſſen  
werden / war vnter andern artickeln geſetzt / Das man  
glauben ſolte / die ſeele ſey vnſterblich / Daraus man  
greiffen mus / das ſie aus dem Ewigen leben ein lau  
ter gehey vnd geſpötte haben / Bekennen damit / das  
bey jnen gantz ein offentlicher glaub ſey / Es ſey kein  
ewigs leben / wollens aber nu mit einer Bulla leren.  
Aber das war noch feiner / Inn der ſelbigen Bullen  
hatten ſie geſetzt / das kein Cardinal ſolte hinfurt ſo  
viel



viel schandbuben halten / Aber Papst Leo / hatte es  
heissen ausleichen / Sonst were es inn alle welt er-  
schollen / wie frey vnd vnuerschampt der Papst vnd  
die Cardinel Sodomam zu Rom hielten. Ich wil  
den Papst nicht nennen / Aber weil die bösewichter /  
nicht wollen büßen / sondern dazu das Euangelion  
verdammnen / Gottes wort lestern vnd schenden / vnd  
sich putzen / So sollen sie auch iren dreck widderumb  
riechen / auff's aller schendlichst. Es ist solchs laster  
so gar gemeine bey inen / das auch newlich ein Papst  
selbst / inn solcher sünde vnd laster / sich zu tod gesün-  
digt vnd inn der that auff der stet tod ist blieben / Da /  
Da / jr Bepste / Cardinel / Papisten / geistlichen herrn /  
Verfolget mehr Gottes wort / Vertheydingt nu ewer  
lere vnd Kirchen.

Solch schendlich leben / das so offenbar ist / strafft  
kein Papst / Cardinal / Bisschoff / Doctor / Pfaff /  
Münch / Nonne / Sondern lachens / putzens / vnd  
schmückens / hetzen Könige / Fürsten / land vnd leute /  
das sie sollen / solche bösewichter / mit leib vnd gut /  
mit landen vnd leuten vertheydingen / vnd ja trewlich  
werden / das solche laster nicht gebüßet noch gebessert /  
sondern gesterckt / befreihet vnd gelobt werden / Die  
zu soltu nu dein blut / leib vnd leben wogen / das sol-  
chs alles auff deinen hals vnd gewissen kome / Ich  
wolt solchs grewels wol mehr exempel erzelen / Aber  
es ist allzu schendlich / Müste sorgen / das vnser deud-  
scher erdboden dafür zittern möchte / Kompt aber ein  
vnuerschampter Papstesel / vnd schreiet hie widder / so  
wil ich mich antreffen vnd heim finden lassen / das sol  
wol getroffen heissen / Sol straffen vnd warnen / zur  
busse helffen /



busse helffen / So sind sie vorhin / vnd hie mit gnug-  
sam vermanet / Aber da wird nicht aus / Es ist nu eine  
löbliche gemeine gewonheit worden / fast einer gros-  
sen tugent gleich / die keine busse leidet / Sondern der  
Kaiser vnd du sollet sie hiez zu schützen vnd handha-  
ben / auff das solch Exempel auch inn andern landen  
auffkome vnd einreise / wie leider bereit allzu viel fur  
augen ist.

Darnach mustu auff dich laden alle den Geitz /  
rauberey vnd dieberey des gantzen Papstums / Das  
vnzelige gelt / so sie mit dem Ablass felschlich vnd bes-  
trieblich vberkomen haben / Ist nicht eitel schend-  
licher raub vnd diebstal durch die gantze Christen-  
heit? Das vnzelige gelt / so sie durch jr erstuncken / er-  
logten Fegfeur haben zu sich bracht / Ist nicht eitel  
schendlicher raub vnd diebstal durch die gantze welt?  
Das vnzelige gelt / das sie mit wucher Messen vnd  
opffer Messen kriegt haben / Ist nicht eitel schend-  
licher raub vnd diebstal durch die gantze welt? Das  
vnzelige gelt / das sie mit butter briuen / walfarten /  
heiligen dienst / vnd des geschwürms on zal / gewon-  
nen haben / Ist nicht eitel schendlicher raub vnd dieb-  
stal durch die gantze welt? Wo her hat der Papst /  
Cardinel / Bisschoue / Fürstenthume / Königreiche /  
vnd sind aller welt / weltliche herrn? Ist nicht eitel vn-  
messlich schendlicher raub vnd diebstal? Was sind  
sie nu anders / denn die aller grösssten reuber vnd die-  
be / so die erden tregt? Noch ist hie kein büssen odder  
widder geben / Ja es ist nicht so viel guts bluts inn  
jren adern / das sie jr ampt ein wenig vbeten / damit  
sie doch / solche güter / mit etwa einem kleinen schein  
F der ehren



der ehren besessen / Sondern dagegen verdammen /  
lestern / verfolgen sie Gottes namen / wort vnd werck  
dazu / Kommen nu her / Du solt mit deinem blut solche  
diebe vnd reuber verteydingen / das sie nicht allein vn-  
gebüßet bleiben / sondern auch gesterckt werden / sol-  
chs alles ihe lenger ihe mehr zu treiben. Da sihe du /  
was fur ein grosser mechtiger dieb vnd schalck / reuber  
vnd verrether du wirst vnd bist / wo du solche reuber  
vnd diebe / mit deinem blut vnd leben sterckest vnd be-  
schützeest / Denn du must es alles auff dich laden vnd  
selb schuldig mit sein.

Darnach mustu auff dich laden alle das blut /  
das der Papst vergossen hat / alle mord vnd krieg /  
die er angericht hat / allen jamer vnd hertzenleid / so  
er inn aller welt gestiffet hat. Wer wil aber erzelen /  
alle das blut / mord vnd jamer / so der Papst mit den  
seinen zugericht hat? Etlich haben gerechent / das  
vmb des Papsts willen alleine ( Sind das Papstum  
sich vber das Keiserthum erhaben hat ) eilffmal hun-  
dert tausent man erschlagen sind / Etliche rechen wol  
mehr / Wo wiltu so viel mord vnd blut auff deinem  
halse ertragen / so ein einiger mord vntreglich ist?  
Vnd Christus auch den zorn im hertzen zum hellisch-  
en feur verurtheilet / Matthej. 5. Was thustu nu / wenn  
du fur solche mörder dein leben wogest? Du machest  
dich solches alles mit schuldig / Vnd hilffest den  
Papst stercken vnd freien / das er solchs ewiglich vnd  
sicher thun müge / Denn da ist keine busse / Ja sie re-  
chens fur lauter tugent vnd ehre / Das vnmüglich ist /  
hie besserung zu hoffen / wie sie denn auch nicht bege-  
ren / sondern / du solt sie helffen schützen / das sie on  
auffhören



auffhören/vnd on weren/on schewe/mügen morden/  
blut störtzen / vnd die welt mit jamer erfüllen / wie sie  
bis her gethan vnd noch thun / Sihe / das sind die  
aller heiligsten Väter / die heiligen Cardinel / Bisscho-  
ne / geistlichen / die vber das Euangelion Richter sein  
wollen / vnd die welt leren vnd regieren.

Ich wil hie der andern laster schweigen / wie sie mit  
giffte / verretherey / vñ alles / was zum has vñ neid gehö-  
ret / handeln / Wer kans alles erzelen / das schendliche  
leben im Papstum? Aus den obgesagten stücken vnd  
teglischen Exempel kan mans wol nemen / Denn  
er sol der Widder Christ sein / vnd mit allen dingen /  
widder Christum sein / Darumb mus folgen / das / so  
schön / herrlich / keusch / züchtig / heilig / himelisch /  
Göttlich leben Christus gefüret vnd geleret hat / so  
ein schendlich / lesterlich / vnzüchtig / verflucht / hel-  
lisch / teufelisch leben mus sein Widder Christ / dage-  
gen füren vnd leren / wie künde er sonst Christus wid-  
dersacher odder Widder Christ sein? Vnd were doch  
alles zu leiden / wo sie es nicht noch dazu vertheydingen  
vnd mit gewalt recht haben wolten. Aber dis ist noch  
alles / so zu rechen / schimpff vnd schertz / wir wollen  
nu die rechten grundsuppen vnd heubt grewel anzei-  
gen / die du alle must auff dich laden / wer den Papst  
schützt / odder inn seinem vnbusfertigem / verstock-  
tem / Eudechristischem stande vnd wesen / erhalten  
vnd stercken hilfft.

Das leben künd man lassen böse sein / Aber die le-  
re vnd Gottes wort verdammen / vnd sich vber Gott  
selbs erheben / das kan man vnd sol auch niemand  
F ij leiden /



leiden / viel weniger helfen vertheydingen / Tu haben  
sie so viel gewel der lere vnter die Christenheit getrie-  
ben / das sie nicht zu erzelen sind / Welcher sie keine  
büßen noch endern / Sondern alle vertheydingt / frey  
vnd recht haben wollen mit gewalt / Das müste denn  
alles auff deinem halse vnd gewissen ligen / vnd mü-  
stest aller solcher gewel teilhafftig vnd schuldig sein /  
wo du hülffest da fur streiten / Vnd das wir der etliche  
anzeigen / Wie wiltu ertragen auff deinem gewissen /  
den schendlichen lügenhafftigen betrug des Abblas /  
damit sie so viel tausent seelen / ja die gantze Christen-  
heit vnd alle welt so schendlich verführet / betrogen /  
vnd vmb jr gelt vnd gut beschissen haben / vnd den-  
noch nichts büßen / auch nicht gedenccken danon abzu-  
lassen / ob sie wol wissen / wie grosse büberey sie hiemit  
getrieben haben / Die leute haben sie geleret / iren trost  
auffs Abblas setzen vnd drauff sterben / welchs allein  
so schrecklich vnd gewolich ist / das / wenn sie sonst so  
heilig vnd rein weren / als S. Johannes der Teuffer /  
doch vmb dieses stückes willen billich inn tieffesten  
abgrund der hellen verdampt / solten sein / vnd nicht  
werd / das sie die erden trüge / noch die sonne beschie-  
ne / schweige / das man noch dazu fur sie streiten vnd  
vertheydingen solt.

Denn rechen du selbst bey dir / was fur eine heubt  
büberey ist mit dem Abblas / Wer sich auffs Abblas ge-  
tröstet vnd verlassen / vnd also gestorben odder gelebt  
hat / der hat damit / den Heiland Ihesum Christum  
müssen lassen faren / verleugnen vnd vergessen / vnd  
gar keinen trost an im haben mügen / Denn wer auff  
etwas anders seinen trost setzt / denn auff Ihesum  
Christ /



Christ / der kan keinen trost an Christo haben / Nu  
wissen wir ja alle / vnd ire bücher beweifens gewaltig-  
lich / das sie vns haben gelert auff's Abblas bawen /  
wer wolt es sonst geachtet odder gekaufft haben?  
Vnd haben daneben des glaubens an Christo / als  
die teufels boten vnd böfewichter / schendlich geschwo-  
gen / ja vnterdrückt vnd vertilget / Denn wer do weis /  
das sein trost vnd zuuersicht stehe auff Christo / der  
kan das Abblas noch keine ander zuuersicht / nicht lei-  
den / Wenn wollen sie aber solchen vnendlichen schas-  
den / büffen vnd erstatten? Ja büffen / Sie wollen vers-  
stockt inn solcher bosheit / noch dazu dich zwingen /  
das du sie solt mit leib vnd blut vertheydingen / vnd als  
les auff dich laden. Wenn sie nicht gar besessen vnd  
rasend weren / So würden sie sich ein wenig schemen /  
solch vertheydung / zu begeren / inn solcher vnbusfert-  
ger / vnuerschampter / lesterlicher bosheit / Das mag  
mir ja recht heissen / Pfaffen sind nicht gut.

Item / Wie wiltu auch tragen auff deinem ge-  
wissen / den lesterlichen betrug des Fegfeurs / da mit  
sie auch alle welt verreterlich generret vnd felschlich  
erschreckt haben / vnd fast alle ir gut vnd pracht da-  
mit erlogen vnd gestolen / Denn damit haben sie den  
einigen trost vnd zuuersicht an Christo / auch rein aus-  
gelesscht / vnd die Christen geleret auff ir nach fol-  
gende stift / gaffen / harren vnd sich verlassen / Denn  
wer auff seine nachfolgende stift odder werck / im ster-  
ben / gaffet vnd hoffet ( wie sie geleret vnd alle gethan  
haben ) der mus Christum aus den augen thun vnd  
die weil vergessen / Also / wo nicht Gott sonderlich  
hette die seinen erhalten / So hetten sie müssen im ster-  
ben / gleich

F iij

ben / gleich



ben/gleich wie die Jüden vnd Heiden/inn der hellen  
abgrund vnuersehens stürzten/ Gleich als wen einer  
von einem hohen berge stürzet / da er meinet/er gieng  
ge auff einem guten wege/vnd trette bey seit abe inn  
die lufft/vnd fiele hinunter ins tal odder meer/D wel  
che seelmörder sind das / Es wird bis an Jüngsten  
tag kein menschlich hertz begreiffen / wie grossen  
mord / sie an den seelen begangen haben / mit irem  
Fegfeuer/Viel weniger istz zu begreiffen / welch einen  
schaden vnd grewliche lesterung sie damit haben be  
gangen/an dem glauben vnd zuuersicht an Christo/  
Noch ist da kein büßen noch auffhören/Sondern  
foddern/du solt sie darinn schützen vnd helffen ver  
teydingen.

Item/Du must auff dich laden alle die grewel  
vnd lesterung / so sie im gantzen Papstumb / mit der  
lieben Messe begangen vñ noch teglich begehen/mit  
keuffen vnd verkeuffen/mit viel vnzelichen andern vn  
ehren des heiligen Sacraments / Da sie Gotte seinen  
son jmer opffern / als weren sie besser vnd heiliger/  
denn Gottes son/Da sie das Sacrament/nicht eine  
gabe Gottes lassen sein / die man mit dem glauben  
empfaben sol/Sondern ein opffer vnd werck draus  
machen/damit sie sich selbs vnd andere leute versü  
nen/vnd allerley gnade vnd hülffe erwerben / Da sie  
einem iglichen heiligen ein eigene Messe / ja einer ig  
lichen sachen odder not / eine eigene Messe gemacht  
haben / Inn allen iren buchern vnd leren findestu  
nicht einen büchstaben / vom glauben / Alles saget  
vnd singet / wie die Messe ein opffer vnd werck sey/  
So doch inn keinem stück/der glaube solte so fast vnd  
vleißig



vleißig getrieben vnd geübt werden / als jnn der Messse  
odder Sacrament / Weil es Christus selbst hat ein-  
gesetzt / zu seinem gedechtnis / das man von im da-  
selbs solt predigen / vnd an in gedenccken vnd glauben /  
Aber dafur predigen sie jr opffer vnd werck / verken-  
ffen die dazu auffss aller schendlichst / Noch ist da kein  
büßen / sondern verstockte verzweinelte bosheit / sich  
zuuerteydingen / vnd durch dein leib vnd leben / sich  
schützen .

Es were allzu grewlich gnug / der grobe eusser-  
liche misbrauch / da die Pfaffen auff den begengnis-  
sen vnd Kirchweyhung odder Patron festen / so leicht-  
fertig mit dem Sacrament handelten / als were es ein  
gauckel spiel / Umb fressens / sauffens / gellts willen /  
rohe vnd frech zu lieffen / darnach vol wurden /  
vnd speyeten vnd spieleten vnd sich schlugen / wie des  
schendlichen misbrauchs alle dörffer vol waren / Vnd  
noch wedder gebüßet noch gebessert / noch fur sünde  
erkand wird / bey den verzweinelten Papst eseln /  
Doch ist er nichts / gegen dem schönen misbrauch /  
da sie das Sacrament verkeret vnd geendert / vnd aus  
dem gemeinen Sacrament des gemeinen glaubens /  
ein eigen werck vnd opffer etlicher personen / als der  
Pfaffen / gemacht haben . Das ist so gar erschrecklich /  
das ich nicht gern dran gedencke / Es möchten einen  
die gedancken wol tödten / Noch ist das vber diesen  
grewel / das sie die wort des Sacraments vnd den  
glauben / verborgen vnd verschwigen haben / das  
( wie gesagt ) nicht ein buchstabe / nicht ein pünctlin  
danon ist vber blieben / im gantzen Papstumb / jnn  
allen Messen vnd büchern / Dis laster vbertriff alle  
wort



wort vnd gedancken / Das kan niemand inn ewigkeit  
gnug schelten odder straffen / Andere laster / hat ein  
iglichs seinen eigen teufel / odder hauffen teufel / die es  
treiben / Aber die opffer Messe / halt ich / sey ein gemein  
werck aller teufel / da sie alle hende / allen rat / alle ge  
dancken / alle bosheit vnd alle schalckheit zu samem  
geschlagen / vnd diesen grewel gestift vnd erhalten  
haben / Das scheint aus dem / das die polter geister  
durch alle welt / inn allen winckeln / als verstorben see  
len / vmb die Messe gebeten haben / Keine seele hat  
noch nie begerd odder gefragt nach Christo / alle  
nach der Messe. So ist das auch ein starck zeichen /  
das die teufel nirgent so gewaltig leben / als inn jren  
Messe knechten / mit aller vnzucht / geitz / lesterung  
vnd allen lastern auffs aller schendlichst / Vnd wird  
freilich der grössert vnd letzter zorn Gottes sein auff  
erden fur dem Jüngsten tage / Denn es kan kein grö  
sser zorn sein. Da hastu die rechte tugent des Bapst  
umbs / dafur du solt kriegen vnd dein blut vergiessen /  
fur die verstockten lesterer / seelmörder vnd bösewich  
ter.

Ob hie jemand wird sagen / Ich werffe zu fast mit  
buben vmb mich / Könne nicht mehr / denn buben  
vnd schelten / Dem sey erstlich also geantwortet / das  
solch schelten / gegen die vnaussprechliche bosheit /  
nichts ist / Denn was ist für ein schelten / wenn ich  
den Teufel einen mörder / bösewicht / verrether / leste  
rer / lägener schelte ? Es ist eben / als wehet in ein lufft  
lin an / Was sind aber die Bapst esel / denn lauter teu  
fel leibhaftig / die keine busse / sondern eitel verstockte  
hertzen haben / vnd solche offentliche lesterung wis  
sentlich verteydingen vnd schutz darinn vom Keiser  
vnd von



vnd von dir begeren / Lieber schilt vnd nenne einen  
Bapst esel / wie du wilt odder kanst / so ist als pfiffe  
in eine gans an / Er hatts also vber macht / das er dei-  
nem schelten viel / viel / viel mal zu gros worden ist /  
Nenne in einen Papisten / so rürestu es gar / vnd hast  
mehr gesagt / denn die welt begreiffen kan / Erger  
kanstu in nicht schelten / Das ander ist / als stechestu  
einen bern mit einem strohalm / odder schlägest mit  
einer feddern auff einen felsen.

Zum andern / sey das mein antwort / Das mich die  
zween Cardinel / Campegius vnd Saltzburg / ver-  
manet vnd geheissen haben / solchs zu thun / damit /  
das der eine sagt / Er wölle sich ehe zu reißen lassen /  
ehe er die Messe wolt lassen endern odder abthun. So  
sagt der ander / Pfaffen sind nicht gut / man solle sie  
vngereformirt lassen. Diese zween aber sind von den  
furnemesten / Vnd wie sie reden vnd glauben / so redet  
vnd glaubt freilich der Bapst mit allen Papisten.  
Weil sie denn selber sagen / das sie verzweimelte böse-  
wichter sind / vnd wollen bösewichter bleiben / vnd  
sich ehe zureißen lassen / ehe sie von Gottes lesterungen  
wollen abstehe / So thet ich in fur Gott vnd fur der  
welt vnrecht / wo ich sie anders / denn mit irem eigen  
namen / den sie in selbst geben / nennete. Solt ich sie  
nu nennen / Erwürdigesten / heilige Peter inn Chris-  
sto / So würde sie niemand kennen / vnd wüsten sie  
selbs nicht / von wem ich redete / weil sie solcher na-  
men nicht kennen / Sondern verstockte bösewichter  
vnd lesterer sind vnd bleiben / Darumb ist mein schel-  
ten kein schelten / sondern eben / als wenn ich eine ru-  
ben / ruben / epffel / epffel / birn / birn nennete.

G

Item /



Item/wo wiltu die grewlichen abgöttereien tragen/  
da sie nicht gnug dran gehabt/die heiligen zu ehren  
vñ Gott inn inloben/Sondern eitel Götter draus ge  
macht haben/Vnd das edle kind die Mutter Maria  
schlecht an Christus stat gesetzt / vnd Christum zum  
Richter ertichtet/vnd den elenden gewissen/einen Ty  
rannen surgebildet/das alle zuuersicht vnd trost von  
Christo genomen/vnd auff Maria gewendet ist/dar  
nach ein iglicher zu seinem heiligen von Christo sich  
gewendet hat/ Kan dis jemand leugnen? Ists nicht  
war? Haben wirs nicht allzu mal versucht vnd erfa  
ren/leider? Sind nicht/sonderlich der schebichten  
Barfusser vnd Prediger Münch bücher fur handen/  
solcher abgötterey durch aus vol/ als die Marialia/  
Stellaria/Rosaria/Coronaria vnd gantz eitel Dia  
bolaria vnd Satanaria? Noch ist hie kein büßen/  
noch bessern/Sondern mit dem kopff hindurch vnd  
verstockt/solch alles vertheydingt vnd dein leib vnd le  
ben zum schutz gefoddert.

Ich mus hie anzeigen ein stück vom Reichstage  
zu Augspurg / auff das man sehe / wie köstlichen  
grund sie haben/zu solcher heiligen abgötterey / Da  
man im Ausschus / diesen artickel / von anruffen der  
heiligen handelte/Brachte D. Eck den spruch erfur/  
Genesis.48. da Jacob von Ephraim vnd Manasse  
sprich t / Et inuocetur nomen meum super pueros  
istos / Vnd nach vielen worten Magister Philippi/  
Er Johann Brentz on gefehr sprach / Man fünde  
nichts inn der schrift/von der heiligen anruffen / Da  
fur D. Cochleus herfur/der sachen zu helffen/ als ein  
tieff bedachter man/vnd sprach/Das man im alten  
Testam



Testament die heiligen nicht angeruffen hette / were  
die vrsache / das die heiligen dazu mal noch nicht im  
himmel / sondern inn der vorburg der hellen gewesen we-  
ren / Da rücket mein gnediger Herr Hertzog Jo-  
hans Friderich Hertzog zu Sachsen &c. die schlin-  
gen zu vber sie beide / vnd sprach zu D. Eck / Da habe  
ir D. Eck ewern spruch verantwortet / den ir aus dem  
alten Testament erfur gebracht habt / Also gewis  
sind sie irer sachen / So fein stimmen sie mit einander /  
die köstlichen schreiber Antilogiarum / Einer spricht /  
Im alten Testament hat man die heiligen nicht an-  
geruffen / Der ander sagt ja / vnd füren sprüche aus  
dem alten Testament / Gerade / als wüste man nicht /  
das Gott vmb Abrahams / Isaacs vnd Jacobs  
willen / alle grosse wunder gethan hat / so im alten  
Testament geschehen sind / wie er selbs offft bekennet /  
Vnd vmb keines heiligen willen im newen Testa-  
ment / die helfft / ja das zehende teil so viel gethan.  
Wie die narren / was in ins maul fellt / speyen sie  
flugs heraus / Noch mus recht vnd grund der artickel  
des glaubens sein / vnd alles vngbüßet vnd dazu  
verteydigt / die leute drüber verdampft vnd erwürgt /  
Dafür soltu kriegen vnd streiten &c.

Vnd das wir auch ein mal ein Exempel sagen /  
inn solcher langen predigt / wil ich aus so viel tausent  
exempeln itzt das erzelen / das inn einem Marial ste-  
het / wie man sol die Jungfraw Maria ehren mit  
opffern. Es war ein Ströter odder strassen reuber /  
der thet sein gantz leben nichts guts / on das er eins  
mals on gefehr inn eine kirche kam / auff vnser fra-  
wen Liecht messe / vnd sahe / wie die leute pfennige

G ij vnd



Es wird ein  
Creutzer ge-  
weßt sein.

vnd kertzen auff den altar opfferten / Da opfferte er  
auch also / Darnach ward er gegriffen vnd erhencckt /  
Da wolten die teufel seine seele zur hellen füren / Aber  
ein guter Engel widderstund in / vnd sprach / War-  
umb füret jr teufel den weg / so jr doch nichts an im  
habt? Sie antworten / Er hat viel böses vnd nie kein  
guts gethan / Da zogen sie mit einander fur Gottes  
gericht / Die teufel verklagten den Ströter / das er kein  
guts gethan / Aber der gute Engel bracht erfur den  
pfennig mit dem creutz gepregt / sampt der kertzen  
auff den altar geopffert / Da gab der Richter das  
vrteil / Der Ströter solt sich weren widder die teu-  
fel / Vnd der Engel gab im den rat / Er solt den  
pfennig inn die lincke hand fassen / fur einen Schilt /  
vnd die kertzen inn die rechte hand / fur ein schwerd  
odder spies / vnd widder die teufel streiten / vnd ei-  
tel creutz schlege thun / Das thet er / vnd vertreib  
die Teuffel / Da kam die seele widder zum leibe /  
vnd ward vom galgen genomen / vnd bracht sein  
leben wol zu / *Dec ille.*

Wer kunds erdencken / wenns nicht war were?  
Solcher schendlicher lügenfabel / haben die Münch  
vnd Pfaffen so viel bücher vol geklickt / das sie die  
Christenheit / wie mit einer sindflut / vberschüt haben /  
Noch hat hie kein Bapst / Bisschoff / Doctor des al-  
les ihe geacht noch gewar worden / Aber nu man pre-  
digt / das Christus vnser Neiland sey / werden sie tol  
vnd vn Sinnig / Da man aber predigte / das eine kertze  
vnd creutzer / vnser lieben frawen geopffert / künde ei-  
nen vnbusfertigen schalck vnd mördere / on Christo /  
on glauben / erretten vnd alle teufel veriagen / vnd  
Christus



Christus leiden vnd leben/lesterte vnd verdrückte/da  
waren alle predigt gut vnd köstlich/Da waren keine  
Ketzer/Aber es gehöret alles dahin/Pfaffen sind nie  
gut gewesen.

Item/wie wil auch dem gewissen/die grosse pla  
ge/marter vnd gewalt/die sie aller welt haben ange  
than/mit irer angst beicht/da mit sie so viel seelen ver  
zweiuelt gemacht / vnd allen Christlichen trost / den  
elenden gewissen geraubt vnd geweret haben/Da sie  
die krafft der Absolution / vnd den glauben / so verres  
therisch vnd boshafftig/verborgen vnd geschwigen/  
allein gedrungen auff die vnleidliche marter vnd vn  
mögliche arbeit/die sünden zu erzelen vnd zu berewen/  
Daben solchem rewen vnd erzelen/als vnserm eigen  
werck/verheissen die gnade vnd seligkeit / damit von  
Christo auff vns selbst geweisert vnd behalten/Sum  
ma/Es ist doch alles/was sie leren vnd thun/dahin  
gericht/das sie vns von Christo / auff jr vnd vnser  
werck führen/Vnd ist kein buchstabe so klein inn irer  
lere/vnd kein wercklin so geringe/es verleugnet vnd  
lestert Christum vnd schendet den glauben an in/  
vnd füret die armen hertzen auff vnnüiglich ding  
vnd zu verzweiueln / Vnd so solte auch der rechte  
WidderChrist thun / das er seinem namen nach/  
reichlich gnug / widder Christum lerete vnd lebete/  
Vnd sich selbs vber Gott vnd sein wort erhübe/Das  
sehen wir im Bapstumb stercker erfüllet / denn man  
begreifen kan/Noch ist solchs alles vngebüßet / ver  
teydingen solche beicht noch hentigs tages / wollen  
auch/das du solche marter / hertze leid/verzweiueln/  
vnd alle plage dieser beicht solt helffen erstreiten/vnd  
G iij      aller see



aller seelen jamer auff dich laden.

Item/Du must auff dich laden/den leidigen jamer vnd verfluchten misbrauch des Bannes vnd der Schlüssel/Welcher misbrauch allein gnugsam verdienet hette/das man das Papstum zu grund liesse gehen/schweige denn/das man dafur streiten solt/den selbigen zu bestettigen vnd stercken / Wie hat der Papst hiemit getobet vnd gewütet/widder Kaiser / Könige vnd alle welt? Ja widder Gott selbs vnd sein heiliges wort/Was im nur der Teufel hat ins hertz gegeben/das hat müssen recht vnd gut sein/Wie viel Kriegs vnd bluts hat er damit angericht inn aller welt. Vnd wer kan allen greuel erzelen? Was er hat wollen/fur sünde haben/das hat müssen sünde heissen vnd sein/Was er hat wollen heilig haben/das hat müssen heilig sein/Die mit ist er ein schrecklicher herr gewesen/vber die gantzen welt/vber leib/seele/gut/land vnd leute/vber fegfeuer/vber helle/vber Teufel/vber himel/vber Engel/vber Gott vnd alles/Wem er hat gewolt/dem ist der himel offen vnd verschlossen / Die helle / zu vnd auffgethan gewest/Wem er hat gewolt/dem ist sein leib/gut/ehre/land/reich/weib/kind / haus / hoff / gelt vnd alles/genomen odder blieben / Vnd was were das Papstum/wo der Schlüssel missebrauch nicht were?

Nu haben sie solchs alles gethan / aus lauter mutwillen/da sie kein recht zu hatten/vmb jres banchs vnd herrschafft willen/Vnd das noch das aller ergeste ist / Gottes namen haben sie dazu auff's aller schendlichst missebraucht / Denn vnter Gottes  
namen



namen haben sie alle solche vnaussprechliche gewel/  
wüten vnd toben / getrieben / Da fur sie doch nicht  
ein einigen gedancken hetten / das sie es bessern wol-  
ten / sondern / wie die harten ambos / verstockt / lassen  
sie auff sich schlagen / vnd bleiben auff solchem fur-  
satz fest / wollen alles noch dazu / durch dein blut vnd  
schutz / verteydingt vnd gesterckt haben / Es were  
nicht wunder / das himel vnd erden zu risse vnd zu  
bürste / vber solcher verzweinelter / trotziger bosheit /  
Vnd das Gott solche vnablessliche bosheit / solchen  
trotz / vnd missebieten so lange leidet. Ich halte / Wenn  
der Türcke wüste / das er so vnrecht were / wie die Pa-  
pisten wissen / das sie solche verzweinelte bösewichter  
sind / Er würde nicht so verstockt sein / vnd Gott / mit  
seiner bosheit / nicht so frechlich trotzen / Denn ich  
halt / das der Türck nicht reden würde / nemlich / Wir  
Türcken sind nie gut gewesen / wie vnser Papisten re-  
den / Wir Pfaffen sind nie gut gewesen. Vnd kurtz /  
das thut allein der Teufel / derselbig weis auch / das  
er böse ist / vnd wil seine bosheit dazu verteydingen /  
Dem selbigen nach thut das Papstum / das erken-  
net solche seine gewolliche bosheit / vnd wil sie vnge-  
bessert / dazu bestettigt / vnd durch dein leib vnd blut  
verteydingt haben. Hastu nu lust zu streiten / Die  
findestu eine redliche ursache / fur die aller heiligsten  
vnd geistlichsten leute / Aber bedencke nur das hun-  
dert tausente teil solcher bosheit / der du dich teilhaff-  
tig machen würdest / so wird dir die lust solchs streites  
wol vergehen / vnd wirst sagen / Ich liesse solche vns-  
busfertige ertzbösewichter das hellische feur haben /  
im abgrund der hellen / ehe ich wolt einen faden re-  
gen vmb iren willen / schweige / das ich mein leib vnd  
leben fur sie wogen solt. Item /



Item/Du must auff dich laden vnd helfen stercken/das verferliche/lügenhafftige/schendliche narrenspiel des Teufels/das sie mit dem heiligthum vnd walfarten getrieben haben/vnd noch keines weges gedenccken zu büßen / Hilff Gott/wie hat es hie geschneiet vnd geregent / ja eitel wolckenburst gefallen/mit lügen vnd bescheißerey/Wie hat der Teufel hie/todte Knochen/Kleider vnd gerete/fur der heiligen beine vnd gerete auffgemutzt/wie sicher hat man allen lügen meulern geglaubt? Wie ist man gelauffen zu den walfarten/Welchs alles der Pappst/Bischove/Pfaffen/Münche haben bestettigt/odder ihe zum wenigsten geschwigen/vnd die lente lasse irren/vnd das geld vnd gut genomen/Was thet allein die newe bescheißerey zu Trier / mit Christus rock? Was hat hie der Teufel grossen jarmarckt gehalten inn aller welt / vnd so vnzeliche falsche wunderzeichen verkaufft? Ach/was ist/das jemand hie von reden mag? Wenn alles laub vnd gras zungen weren/sie künden allein dis bubenstück nicht aus sprechen / Noch müssen wir zu sehen/das sie es nicht bekennen noch büßen / sondern erhalten / stercken vnd bessern wollen/dazu durch dein leib vnd blut.

Vnd das noch das aller ergest ist / Das sie die lente hie mit verführet vnd von Christo gezogen haben / auff solche lügen zu trawen vnd bawen / Denn es ist keiner dem heiligthum odder walfart nach gelauffen/Er hat seine zuuersicht vnd trost darauff gesetzt/vnd seinen Christum / daheim / das Euangelion vnd glauben/dazu seinen stand/dagegen verachten / vnd als fur nichts halten/müssen. Aber  
die Papiſten/



Die Papisten/haben solcher verführung der seelen/solche verleugnung vnd verachtung Christi vnd seines glaubens/nicht allein nicht geweret/sondern lust vnd freude dran gehabt/vnd mit Ablass vnd gnaden geziert vnd gesterckt/vnd sich gar wol damit geweidet/alle welt geschunden vnd geschaben / Noch ist da kein bessern odder büßen/Sondern eitel trotziger furatz/solchs alles zu mehren vnd stercken/vnd schlecht keine newerung zu leiden. Die höret her das gülden jar/so die ertzlügenere die Bepste ertichtet haben/auch den Engeln geboten/der pilger seelen gen himel zu führen. Aber/Es ist alles vnd alles zu hoch vnd zu viel/vber alles reden vnd gedencken. Es heisst/Abominatio in loco sancto/Grewel inn der heiligen stete/So hat Christus das Bapstum genennet / mit einfeltigem/aber doch vnbegreiflichem wort.

Ich meine ja/das Bapstum sey ein gewel/nicht allein mit solchen bösen stücken/Sondern auch mit vnbusfertigkeit / das es solche stücke nicht bessern/sondern vertheydingt haben wil / Vnd sündigt also nicht allein/mit der that an jr selbs/Sondern bestetigt solche sünde mit vnbusfertigkeit/das ist/mit sünden inn den heiligen geist / das nicht höher komen/noch erger werden kan/Denn der Teufel selbs nicht höher noch erger sündigen kan / Siehe / das sind die gesellen/die vber Gottes wort Richter sein wollen/die dürffen vns an muten / das wir vnser lere sollen widerruffen vnd büßen. Item/das wir alle solche gewel sollen anbeten/für Gotts wort vñ werck/Sie wollen vngereformirt sein/vñ kurtz vmb keine newerung leiden. Weisst das nicht auffrur erwecken / was heisst  
D denn



denn auffrur erwecken? Weisst das nicht pestilentz/  
theur zeit / Türcken / krieg / mord / vnd allen Gottes  
zorn vnd plage erregen / was ist denn so böse jmer  
mehr / das erregen müge? Aber ich mus hie auff hö-  
ren der grewel / so noch viel dahinden sind / mehr zu  
rüren / Als da sind die bruderschaften / gelübde zum  
heiligen / vnd der grosse jar marckt / da die Pfaffen  
vnd Mönche aller welt ire gute werck vnd kappen  
verkauften / vnd im sterben damit kleideten / vñ gen hi-  
mel füreten / Es möchten sonst einem alle sinnen da-  
fur geschwinden vnd vergehen / Es ist leider allzu  
viel an einem halben teil / eines einigen stücks.

Die dritte ursache / das du dem Keiser inn solchem  
auffbot nicht solt gehorham sein / ist / das du nicht  
allein solche grewel must auff dich laden vnd helffen  
stercken / sondern must auch helffen störtzen vnd aus-  
rotten alle das gut / so durch das liebe Euangelion ist  
widder auffbracht vnd angericht / Denn die böse  
wichter wollen nicht gnug daran haben / das sie sol-  
che teufeley vnd grewel erhalten / dazu ( wie sie im  
Edict gebieten ) keine newerung dulden / Sondern  
ausrotten vnd gantz vertilgen / alles / was wir ihe ge-  
leret / gelebt vnd gethan haben / vnd noch thun vnd  
leben. Diese ursachen begreiffst auch viel inn sich /  
Denn vnser Euangelion hat / Gott lob / viel grosses  
gutes geschafft. Es hat zuvor niemand gewust / was  
das Euangelion / Was Christus / Was Tauffe / Was  
Beichte / Was Sacrament / Was der Glaube / Was  
Geist / Was Fleisch / Was gute werck / Was die Ze-  
hen gebot / Was Vater vnser / Was beten / Was leidē /  
Was trost / Was weltliche oberkeit / Was ehestand /  
Was elz



Was eltern / Was kinder / Was herrn / Was knecht /  
Was fraw / Was magd / Was Teufel / Was Engel /  
Was welt / Was leben / Was tod / Was sünde / Was  
recht / Was vergebung der sünden / Was Gott / Was  
Bischoff / Was Pfarherr / Was Kirche / Was ein  
Christ / Was Creutz / sey. Summa / Wir haben gar  
nichts gewust / was ein Christ wissen sol / Alles ist  
durch die Bapst esel vertunckelt vnd vnterdruckt / Es  
sind ja Esel / vnd grosse / grobe / vngelerete Esel / inn  
Christlichen sachen / Denn ich bin auch einer gewest /  
vnd weis / das ich hierin die warheit sage / Vnd wer-  
den mir des zeugen alle frumen hertzen / die vnter dem  
Bapst / so wol als ich / gefangen / gern solcher stück  
eins hetten gewust / vnd habens nicht wissen können  
noch müssen / Wir wusten nicht anders / denn Pfaf-  
fen vnd Mönche weren alles gar alleine / vnd auff  
iren wercken stunden wir / vnd nicht auff Christo.

Aber nu ist / Gott lob / dahin komen / das man  
vnd weib / jung vnd alt / den Catechismum weis / Vnd  
wie man glauben / leben / beten / leiden / vnd sterben  
sol / Vnd ist ja eine schöne vnterricht der gewissen /  
wie man sol Christen sein vnd Christum erkennen /  
Man predigt doch nu von glauben vnd guten wer-  
cken recht / Vnd summa / die obgenanten stück sind  
widder ans liecht komen / vnd predigstule / altar vnd  
tauffstein widder zu recht bracht / Das / Gott lob /  
widderumb einer Christlichen Kirchen gestalt zu er-  
kennen ist. Solchs alles mustu aber helffen ausrot-  
ten vnd vertilgen / wo du fur die Papisten kriegest /  
Denn sie wollen der stück / von vns geleret vnd ange-  
richt / keines nicht leiden / Sondern (wie sie sagen)

D ij      das pos



das possessorium haben/widder inn die alten gewehr  
sitzen/vnd gar keine newerung dulden. Da mustu  
helffen alle Deudsche bücher/new Testament/Psal-  
ter/bettbüchlin/gesang büchlin/vnd alles/was wir  
von vielen guten dingen geschrieben haben / das sie  
selber bekennen/ verbrennen / Du must helffen / das  
niemand die Zehen gebot / das Vater vnser / den  
Glauben wisse ( Denn so ist vorhin gewesen ) Du  
must helffen/ das niemand von der Tauffe/Sacra-  
ment / Glauben / Oberkeit / Ehestand / noch vom  
Euangelio etwas lerne / Du must helffen / das nie-  
mand die Christlichen freiheit kenne / Du must hel-  
ffen / das niemand auff Christum sein trawen vnd  
trost setze/Denn solches alles ist vorhin nicht gewesen/  
vnd ist eitel newerung.

Item / Du must helffen / das vnser Pfarherrn  
vnd Prediger kinder/arme verlassene waislin als hur-  
kinder verdampt vnd geschendet / werden / Du must  
helffen/das man widderumb an Christus stat / auff  
der Münche vnd Pfaffen werck sich verlasse / vnd ir  
verdienst vnd kappen im sterben / keuffe / Du must  
helffen/das sie an stat der ehe/widderumb die Chris-  
stenheit füllen/mit hurerey/ehebruch vnd andern vn-  
natürlichen schendlichen lastern. Du must den grew-  
lichen jar marcet der opffer Messen helffen widder  
anrichten / Du must alle iren geitz / raub / diebstal/  
damit sie ire güter bekommen / helffen verteydingen.  
Vnd was sol ich viel erzelen? Du must helffen Chri-  
stus wort vnd gantzes reich / verstören / vnd dem  
Teufel sein reich widder bawen / Denn da wollen  
die bösewichter hin/die auff's possessorium odder auff  
die alten



Die alten gewehr dringen. Sie sind des Ende Christs  
odder Widder Christs / Darumb können sie nichts  
anders thun / denn das widder Christum ist / sonder-  
lich jnn dem heubt artickel / Das vnser hertz seinen  
trost vnd zuuersicht / nicht auff vnser werck / sondern  
allein auff Christo setzen sol / das ist / allein durch den  
glauben von sünden frey / vnd gerecht werden / wie  
geschrieben stehet / Roma. 10. Mit dem hertzen gleubt  
man / so wird man gerecht.

Diesen Artickel ( sage ich ) wollen sie schlecht  
nicht leiden / So können wir sein nicht geraten /  
Denn wo der Artickel weg ist / so ist die Kirchweg /  
vnd mag keinem irthum widderstanden werden /  
weil ausser diesem Artickel / der heilige geist / nicht bey  
vns sein wil noch kan / Denn er sol vns Christum ver-  
kieren. Vber diesem Artickel ist die welt so offft zu  
scheitern gangen / durch Sindflut / wetter / gewesser /  
Krieg vnd alle plagen / Vber diesem Artickel ist Nabel  
erwürgt vnd alle heiligen / vnd müssen auch alle Chri-  
sten drüber sterben / Dennoch ist er blieben vnd mus  
bleibē / Vnd die welt jmerdar drüber zu grund gehen /  
Also sol sie jtz auch herhalten / vnd vber dem Artickel  
gestörtzt werden / Vnd solt sie toll vñ töricht werden /  
so sol sie den Artickel lassen stehen / vnd sie drüber  
jnn der hellen grund fallen / Amen. Nu bedenck  
vnd besihe dich eben / Soltu widder Gott vnd sein  
wort / vnd alles was Gottes ist / streiten / Soltu alle  
grewel des Bapstumbs / vnd alle das vnschuldige  
blut / so von Nabel her vergossen ist / auff dich laden /  
Soltu alle das gut helffen ansrotten / so vns durchs  
Euangelion widderfaren ist / vnd endlich Christus  
D iij reich



reich verstoren vnd des Teufels reich bawen/ So si-  
he zu/ was du fur sieg erlangen werdest/ vnd mit wa-  
serley gewissen du dem Keiserlichem auffbot gehor-  
sam seiest.

Ist dir nu zu raten/ So hastu hierinn warnung  
gnug/ das du dem Keiser vnd deinem Fürsten nicht  
solt gehorsam sein/ inn solchem fall/ wie die Apostel  
sagen/ Man mus Gotte mehr gehorsam sein/ denn  
den menschen/ Wiltu folgen/ ist gut / Wiltu nicht/ so  
lasse es/ vnd fare jmer hin/ vnd streite getrost / Chri-  
stus wird sich fur dir nicht furchten / vnd wird ( ob  
Gott wil ) auch fur dir bleiben . Bleibt er aber/ so sol  
er dir streitens gnug geben/ Wir wollen die weil zu se-  
hen / welcher den andern vberpochen vnd das feld  
behalten werde.

Dis wil ich meinen lieben Deudschen zur war-  
nung gesagt haben/ Vnd wie droben / also bezeuge  
ich hie auch / das ich nicht zu krieg / noch auffrur/  
noch gegenwere wil jemand hetzen odder reitzen/  
Sondern allein zum friede / Wo aber vnser Teufel/  
die Papisten/ nicht wollen friede halten / sondern mit  
solchen verstockten greueln/ vngewisset/ widder den  
heiligen geist rasend / dennoch kriegem / vnd drüber  
blutige köpffe dauon bringen / odder gar zu boden  
gehen würden / wil ich hie mit öffentlich bezen-  
get haben / das ich solchs nicht gethan / noch vr-  
sache dazu gegeben habe / Sondern sie wollens so  
haben/ jr blut sey auff irem kopff / Ich bin entschül-  
digt / vnd hab das meine auffss aller trewlichst ges-  
than / Dinfurt las ich den richten/ der richten wil/  
sol vnd



sol vnd auch kan / der wird nicht seumen vnd auch  
nicht feilen / Dem sey lob vnd ehre/danck  
vnd preis inn ewigkeit / A M E N.

Bedruckt zu Wittenberg  
Durch Hans Lufft.  
M. D. XXXI.





Handwritten text, likely bleed-through from the reverse side of the page. The text is mirrored and difficult to decipher due to fading and bleed-through.

Geordnet von  
Durch seine Lust.  
D. D. XXI.

Handwritten blue ink mark or signature at the bottom left of the page.













Ng. 4460

X2206441



m.c.











Warnunge  
D. Martini Lu-  
ther / An seine  
lieben Deud-  
schen.

Wittenberg.  
1 5 3 1.

XVII 516

